

Tti Jian Joajné Jesucristo Que Dicjin Marcos

*Juan ndache chojni ngagaha jna joajné Dios
(Mt. 3.1-12; Lc. 3.1-9, 15-17; Jn. 1.19-28)*

¹ Janhi coexinxin joajné Jesucristo, Xenhe Dios.

² Profeta Isaías dicjin janhi:

Ndaçho Dios ngain Xenhe: Tsjexin, saho rror-roanha ná tti sicao joajnana para sinchegjian nttiha para ixin jaha.

³ Co tsinhi na ná tté chojni que tsoyaoxin ngagaha jna que rrondaçho:

“Nchegjian ra ná nttiha para ixin jehe tti chonda cain joachaxin; danttjehe ra ná nttiha nao.”

⁴ Cottimeja, ndoa, jañá joí Juan ngagaha jna, vancheguite chojni. Co vandaçho ngain na ixin chonda na que tsentoxinhi na cain cosa jianha que tenchehe na co siguite na. Co jamé Dios sinchetjañehe na cain cosa jianha que joinchehe na.

⁵ Mexinxin vacji cainxin chojni que vintte nont-tehe Judea co chojni que vintte ngain ciudad de Jerusalén para vaquinhi na quehe vandaçho Juan. Co are jehe na vaquendoenhe ñao na cainxin cosa jianha que vanchehe na, cottimeja Juan vancheguittexin na ngain río Jordán.

⁶ Lonttoe Juan diconchjian de joxon xehe camello, co cinturoen de joxon roa. Co tti vane Juan joxon coxoali co tsjén cormena que vagoan ngagaha jna.

⁷ Co Juan vandaĉho ngain chojni:

—Después de janha tsí iná chojni que chonda anto tsje icha joachaxin que janha. Co janha jiquininxinha na ni para sisehe para tsonxindangá corrié catté.

⁸ Janha nttaguittexin jaha ra conixin jinda; pero jehe sinttaguittexin ra conixin Espíritu Santo.

Are joiguitte Jesús

(Mt. 3.13-17; Lc. 3.21-22)

⁹ Co tiempo mé Jesús vaĉhjexin de ngain rajna Nazaret jí ngain nonttehe Galilea para sacjoi ngain Juan. Co Juan joincheguitte Jesús ngain río Jordán.

¹⁰ Co are Jesús vaĉhjenguixin de jinda, vicon que ngajni xiré, co Espíritu Santo de Dios xincanji ħá ná conttoanjani ngataha Jesús.

¹¹ Co rato mé coinhi na tté Dios que nichjaxin de ngajni co ndaĉho:

—Jaha tti Xanhna que janha anto rinaho; co de ixin jaha, janha anto chahna.

Satanás rrojinao rrojincheyehe Jesús

(Mt. 4.1-11; Lc. 4.1-13)

¹² Cottimeja Espíritu Santo de Dios sajoicao Jesús para ngagaha jna tti ħonhi chojni jí.

¹³ Co nttiha ngagaha jna tti vintte tsje coxigo ĉhintto, vehe Jesús cuarenta nchanho. Cottimeja Satanás cjoi ixin joinao rrojincheyehe Jesús para rrojinchehe cosa jianha, pero coixinha joincheyehe. Cottimeja joí ángel de Dios para joincheatendehe Jesús.

Jesús coexinhi xé ngain Galilea

(Mt. 4.12-17; Lc. 4.14-15)

¹⁴ Después que coiaxinhi na Juan ngain cárcel, Jesús cjoí para nonttehe Galilea, co joindačoho tti jian joajna de quežén ttetonha Dios.

¹⁵ Vandáčho Jesús ngain chojni:

—Ojoí tiempo que Dios siquetonha daca ngataha nontte. Ttentoixinhi ra cain cosa jianha que tenchehe ra co ditticaon ra tti joajna que danjo iná vida naroxin.

Jesús nichjé nó xí que vatse copescado

(Mt. 4.18-22; Lc. 5.1-11)

¹⁶ Are Jesús jittji ngandehe lago de Galilea, Jesús vicon Simón co xanchó Simón xan Andrés. Cayoi nimé copescado vatse na, co rato mé tatetjahngui na nonchaha jinda.

¹⁷ Co Jesús ndáčho ngain na:

—Āacoi ra rroehna ra; jaha ra tse ra copescado, pero janha tsjagoha ra quežén satse ra chojni para ixin Dios.

¹⁸ Co rato mé cointtohe na nonché na co sacjoi na conixin Jesús.

¹⁹ Cjinha joiiji na are Jesús vicon Jacobo co Juan, cayoi nimé xenhe Zebedeo. Tate na ngá ná barco tetteyehe na nonché na.

²⁰ Co rato mé Jesús vayé cayoi jehe na, co jehe na nttiha cointtohe na ndodé na Zebedeo ngain barco mé conixin ninchehe xé, co cayoi jehe na sacjoi na conixin Jesús.

Ná xí que vechonda espíritu jianha

(Lc. 4.31-37)

21 Cottimeja joihi na ngain rajna Capernaum. Co Jesús vixinhi nihngo nttiha para joinchecoene chojni Israel ngain nchanho que nchejogaha na.

22 Co cain nivaquinhi tti vanichja Jesús vagoan na admirado ixin Jesús vanichja inchin ná chojni que chonda anto tsje joachaxin co jeha inchin vanichja ximaestroe ley Israel.

23 Co ngain ningoe rajna mé vehe ná xí que vechonda xa espíritu jianha co coyaothe xa Jesús co ndačo xa:

24 —¿Quehe sinchehe nganji janha na, jaha Jesús de Nazaret? ¿Ajaha joihi para santsjena ra joachaxin que chonda na? Janha chonxin jaha co nona ixin jaha tti anto jian de ngain Dios.

25 Cottimeja Jesús joinchesattehe espíritu jianha mé co ndačo:

—Tencoja jaha espíritu jianha, co sattjixin de ngain xí yá.

26 Co are espíritu jianha vačhjexin de ngain tti xí mé, jehe espíritu jianha joincheguenda jehe xa, coyao soji co sacjoixin de ngain tti xí mé.

27 Co cainxin chojni que te nttiha xaon na co joanchianguihi chó na co ndačo na:

—¿Quehe jihi? Ojé cosa jitjagoa na xí jihi. ¡Xí jihi chonda xa joachaxin hasta ttetonhe xa espíritu jianha, co espíritu jianha ditticaon tti ndačo xa!

28 Co cainxin rajna que te ngain nonttehe Galilea anto daca conohe na quehe vanchehe Jesús.

*Jesús joinchexingamehe jannché Simón Pedro
(Mt. 8.14-15; Lc. 4.38-39)*

²⁹ Cottimeja Jesús vačhjexin de nihngo mé. Co jehe Jesús, conixin Jacobo co Juan sacjoi na para nchiandoha Simón co Andrés.

³⁰ Co tiempo mé jannché Simón Pedro venihi jaxin soa. Co ndačo na ngain Jesús ixin venihi naníta mé.

³¹ Cottimeja Jesús conchienne, co tsehe rá naníta mé co joinchengattjen. Co toin rato mé xingamehe co ixonhi soa veyá. Co jehe naníta mé joincheaten-dehe na.

*Jesús joinchexingamehe anto tsje chojni nihi
(Mt. 8.16-17; Lc. 4.40-41)*

³² Co are viataon nchanho co conaxin xehe, joicaohé na Jesús cainxin chojni venihi co cainxin chojni que vechonda espíritu jianha tiempo mé.

³³ Co cainxin chojni ngain rajna mé xatte na ngandanguí nchia tti vehe Jesús.

³⁴ Jesús joinchexingamehe anto tsje chojni que vechonda ojejé chin. Co chojni que vechonda espíritu jianha Jesús joantsjexin espíritu mé de ngain na. Pero Jesús joanjoha joachaxin para nichja cain espíritu jianha ixin cain espíritu jianha ovenohe quensen jehe Jesús.

*Jesús nichjé chojni ngain Galilea de ixin Dios
(Lc. 4.42-44)*

³⁵ Co are ochian jidingasán, Jesús vingattjen co vačhjexin de ngain rajna mé para sacjoi ngain iná lugar tti xonhi chojni vintte co nttiha joinchecoanxinxin Dios.

³⁶ Cottimeja Simón co icha chojni que vacao Jesús joicjé na.

³⁷ Co are vittja na Jesús, ndačo na ngain:

—Cainxin chojni tedanchiangui na jaha.

³⁸ Pero Jesús ndačo:

—Ján, pero sachjin na ngain icanxin rajna chian para que janha rronichja nttiha cai tti joajné Dios que janha joiquinha, porque para ixin mé joihi janha nttihi.

³⁹ Jamé vacji Jesús ngain cainxin nihngo que vintte ngain nonttehe Galilea para ndache na de ixin Dios co para vaguenguixin espíritu jianha de ngain chojni.

Jesús joinchexingamehe ná xí que vechonda lepra

(Mt. 8.1-4; Lc. 5.12-16)

⁴⁰ Ná tattíta veninxin chin lepra conchienne ngain Jesús, co tattíta mé vettoxin nttajochjihi co ndačo ngain Jesús:

—Si jaha rinao, nchao sinchexingamana de chin que rrichonda.

⁴¹ Jesús coiaconoehe, mexinxin catte conixin rá co ndačo:

—Ján, rinaho. Xingamaha.

⁴² Co are Jesús joexin ndačo yá, tattíta mé ndavačhehe chin lepra que vechonda, co ixonhi chin vechonda.

⁴³ Cottimeja Jesús coetonhe sacjoi, co ndačo:

⁴⁴ —Pero xonhi chojni ndache, jeho ttji ngain xidána para que jehe xa sicon xa que jaha ixonhi chin chonda. Co danjo cosa ngain Dios inchin coetonhe Moisés para que cainxin chojni tsonohe na ixin jaha oxingamaha.

⁴⁵ Pero tattíta mé sacjoi, co coequín chojni cainxin tti jehe conhe. Mexinxin Jesús ičoha

vařago ngain rajna. Co vacji jeho ngain lugar tti řonhi chojni vintte. Pero masqui jamé, vacji tsje chojni de cainxin rajna ngain tti vehe Jesús.

2

*Jesús joinchexingamehe ná xí que řhoha vacji
(Mt. 9.1-8; Lc. 5.17-26)*

¹ Vatto canxion nchanho cottimeja Jesús cjan cjoí ngain rajna Capernaum. Co chojni conohe ttinó mero vehe Jesús nttiha.

² Anto daca řatte anto tsje chojni ngain Jesús que ni vittjaha nchia vixinhi na co hasta tti ndoja vixin na. Co nttiha Jesús ndache na joajné Dios.

³ Cottimeja nó tti xí tetsengui iná xí que řhoha vacji; vintteguicao xa ngain Jesús.

⁴ Pero řhoha vatto na para tti jí Jesús, ixin anto tsje chojni te ngandanguí nchia mé. Mexinxin cjoáso na ngataha nchia co vinttjian na rioho techoe nchia co nttiha joinchexincanjinxin na tti nihi mé conixin ná jino ngain camillé para ngain lugar tti jí Jesús.

⁵ Co are Jesús vicon queřén joinchehe na, jehe conohe ixin jehe na vitticaon na que jehe chonda joachaxin. Co Jesús ndačo ngain tti nihi mé:

—Ojointtatjañaha jaha cain tti jianha joinchehe.

⁶ Co nttiha tate canxion ximaestroey ley Israel, co řaxaon xa:

⁷ “¿Quedonda jañá jinichja xí yá? Ixin ndačo xa nchao nchehe xa cosa que jeha Dios nchao nchehe. řonhi quensen nchao nchetjañehe chojni tti jianha que nchehe na; jeha Dios tti nchao nchetjañehe na.”

⁸ Pero Jesús oconohe tti xaxaon ximaestro mé, co ndačo ngain xa:

—¿Quedonda jañá xaxaon jaha ra?

⁹ ¿Quexehe tti icha tanguiha, rrondattjan ná tti nihi: “Ovitjañaha jaha cain tti jianha joinchehe”, o rrondattjan: “Dingattjen, co tsinhi camillá co sattjixin rottea”?

¹⁰ Co tsjagoha ra cai ixin janha tti Xí que joixin de ngajni chonda joachaxin ngataha nontte nttihi para nttatjañá chojni tti jianha que nchehe na.

Cottimeja ndačo Jesús ngain tti nihi mé:

¹¹ —Jaha rrondattjo, dingattjen, co tsinhi camillá co sattji para nchiandoi.

¹² Co rato mé vingattjen tti nihi mé, co coame camillé, co vačhjexin de nttiha are tatetsjehe ni icha. Co rato mé cainxin chojni que vintte nttiha goan na admirado co joinchesayehe na Dios ixin jehe anto jian co chonda cainxin joachaxin. Co ndache chó na:

—Xonhi nttiha vocon na ná cosa janhi.

Jesús nichjé Leví

(Mt. 9.9-13; Lc. 5.27-32)

¹³ Cottimeja Jesús cjoí ngandehe lago de Galilea iná, co are conchienne tsje chojni ngain Jesús, jehe joinchecoenhe na de ixin Dios.

¹⁴ Co are Jesús sacjoixin de ngandehe lago mé co vatto ngandanguí ná caseté cobro, Jesús vicon nttiha tají ná tattíta vinhi Leví jinchehe cobro nttiha, co ndodé vinhi Alfeo. Jesús ndačo ngain jehe Leví:

—Xacoi nganji co rroehna na.

Co Leví vingattjen co sacjoí conixin Jesús.

15 Co después are Jesús tajine ngaxinhi nchiandoha Leví, conchienne anto tsje xicobrador co icha chojni que vanchehe cosa jianha. Cain chojni mé jinecaho na Jesús conixin cain chojni que vacao ixin anto tsje chojni varroé.

16 Co cai cjoí canxion ximaestroey ley co icanxin xifariseo ngain nchiandoha Leví. Cain chojni mé vicon ixin Jesús jine conixin tsje chojni que nchehe cosa jianha, co ndačo cain xí mé ngain chojni que vacao Jesús:

—¿Quedonda ximaestroa ra jinecaho xa co dicahoy xa xicobrador co icha chojni que nchehe cosa jianha?

17 Are Jesús coinhi yá ndačo:

—Chojni que niha, chojni mé rrogondeha xincheşoan, jehoy tti chojni nihi, mé tti rrogondehe xincheşoan. Mexinxin janha joiha para joinichjá chojni jian, sino que janha joihi para joinichjá chojni que tenchehe jianha.

Are joanchianguihi na Jesús ixin quedonda chojni jehe dinttecjaño na

(Mt. 9.14-17; Lc. 5.33-39)

18 Nchanho mé chojni que vacao Juan co chojni que vacao xifariseo vinttecjaño na. Co icanxin chojni cjoí na ngain Jesús co joanchianguihi na co ndačo na:

—¿Quedonda chojni que şicao Juan co chojni que şicao xifariseo dinttecjaño na pero chojni que çhijho jaha nahi?

19 Jesús ndačo:

—¿Acasoy cain chojni que ttjiny ngain ná vandangoy tti tottehe na nchao sinttecjaño na are şa nttiha jí

xinovio ngain na? Nahi, jehe na čhoha sinttecjáno na si řa jí xinovio ngain na.

²⁰ Pero are tsí nchanho que xinovio satsjixin de ngain na, cottimeja jehe na chonda que sinttecjáño na.

²¹ Co Jesús ndačo iyó ejemplo:

—Āonhi chojni tteyehe rioho lontto naroa ngain ná lontto nttaxí ixin lontto naroa ndadixehe co ndattinchje lontto nttaxí, co tti diguichje icha tojie.

²² Co cai řanttjoa are jidatsoxinhi řan, čhoha siquia řan ngá ná roanřan onttaxí ixin tsončhintaon řan roa mé, co ndasitján řanttjoa co ndasitján roanřan. Mexinxin řanttjoa are jidatsoxinhi řan, chonda que siquia řan ngá ná roanřan naroaxin para dacaha tsončhintaon řan roanřan mé. Jańá tti costumbre que jaha ra chonda ra jiha de acuerdo ngain tti janha rrindattjo ra.

Chojni que vacao Jesús cončhinji na trigo ngain nchanho que nchejogaha ni

(Mt. 12.1-8; Lc. 6.1-5)

²³ Ná nchanho que nchejogaha ni, Jesús conixin chojni que vacao vatto na ngain canxion jngui tti diguinga trigo, co chojni que vacao Jesús cončhinji na canxion ninchjan de trigo para joine na.

²⁴ Co canxion xifariseo vicon xa queřén tenchehe na. Mexinxin ndačo xa ngain Jesús:

—Tsjexin, ¿quedonda chojni que čhjiho nchehe řa jai que jiquininxinha nchehe chojni řa, ixin jai nchanho para nchejogaha cain chojni?

²⁵ Co Jesús ndačo:

—¿Axa tsjeha ra tti jitaxin de ixin quexén joinchehe David conixin cain xicompañeroe are vechondaha na tomi co venhe na jintta?

²⁶ Are mé Abiatar vehe xidána icha importante, co David joixinhi ngaxinhi nchiandoha Dios co joine niottja que vehe ngataha altar, co jeha xidána jiquininxin para jine niottja mé. Co David chjé chojni que vacao nio cai co joine na nio.

²⁷ Cai ndačo Jesús ngain xa:

—Nchanho que nchejogaha chojni jí nchanho para ixin chojni co jeha chojni te para ixin jehe nchanho mé.

²⁸ Mexinxin cai janha, tti Xí que joixin de ngajni, chonda joachaxin para ngain nchanho que nchejogaha ni.

3

*Ná xí que ndadixemadoho ná rá
(Mt. 12.9-14; Lc. 6.6-11)*

¹ Iná nchanho Jesús cjoí ngaxinhi ná nihngo iná. Co nttiha tají ná xí que ndadixemadoho ná rá.

² Co nttiha tetsaya canxion xifariseo para sicon xa aco sinchexingamehe xí mé ngain nchanho que nchejogaha ni, para jamé rrochonda quehe rrocjanguixin xa Jesús.

³ Cottimeja ndačo Jesús ngain tti xí que ndadixemadoho ná rá:

—Dingattjen co darihi nttimé ngosine.

⁴ Cottimeja joanchiangui Jesús ngain xicanxin co ndačo:

—¿Quehe jiquininxin sinchehe ni ngain nchanho que nchejogaha ni? ¿Asinchehe ni jian o sinchehe

ni jianha? ¿Atsančhjandaha ni ndasenhe ná chojni, o ani nasoenxon ni?

Co cain xa tencoa xa.

⁵ Cottimeja Jesús goñao co tsjehe ngain xa co anto vechín ixin vicon que jehe xa joinaoha xa coinxin xa de ixin Dios. Co ndačo Jesús ngain tti venihi:

—Ttinxe rá.

Co jehe tti xí mé coinxe rá co ndaxingamehe ra.

⁶ Cottimeja cain xifariseo sacjoi xa co coexinhi xa cjoao xa chojni que vacao Herodes ixin queñén sinchehe na para nasoenxon na Jesús.

Are anto tsje chojni xatte ngandehe lago

⁷ Cottimeja Jesús sacjoixin de nttiha conixin cainxin chojni que vacao co sacjoi na para ngandehe lago de Galilea co anto tsje chojni Galilea rroé na.

⁸ Co chojni joixin de nontte dinhi Judea, de ciudad de Jerusalén co de ngain iná nontte dinhi Idumea. Icha chojni joixin lado čhinxin nchanho de río Jordán. Icha na joixin na de ngain ciudad de Tiro co Sidón. Co icha na joixin na de icha rajna. Cainxin chojni mé cjo na joitsjehe na Jesús ixin jehe na conohe na de ixin cainxin cosa jian que vanchehe Jesús.

⁹ Mexinxin Jesús ndache chojni que vacao ixin cjoé na ná barco para sengá ngataonhe jinda are rroçatte tsje chojni para sixintjaha chó na ngaca Jesús.

¹⁰ Ixin anto tsje chojni venihi joinchexingamehe Jesús, mexinxin cainxin ninihi vaçattetja na Jesús para vacatte na.

11 Co are chojni que vechonda espíritu jianha vaguicon Jesús, vaguettixin nttajochjihi co vandačo sén:

—¡Jaha tti Xenhe Dios!

12 Pero Jesús vaquetonhe ixin rrondačoha quensen jehe Jesús.

*Jesús coinchiehe tti tteyó chojni que vacao
(Mt. 10.1-4; Lc. 6.12-16)*

13 Cottimeja Jesús coani ná jna, co nttiha jehe vayé chojni que jehe joinao coinchiehe co jehe na conchienne na ngain jehe.

14 Co jehe coinchiehe tteyó chojni para sacao co para rrorroanha na icanxin rajna para rronichja na joajné Dios.

15 Co joanjo joachaxin ngain na para sinchexingamehe na chojni nihi co para senguixin na espíritu jianha de ngain chojni.

16 Co janhi vinhi tti tteyó chojni mé. Ná vinhi Simón, co Jesús joincheguini jehe Pedro cai;

17 co Jacobo conixin Juan xanchó jehe Jacobo, co cayoi nimé xenhe Zebedeo co cayoi nimé Jesús joincheguini na Boanerges ixin anto čhinto vintte na;

18 co icha chojni vinhi Andrés; Felipe; Bartolomé; Mateo; Tomás; co iná tti vinhi Jacobo cai, pero mé xenhe Alfeo; co Tadeo; co Simón, jehe ná de tti partidoe chojni politico que vaquetocaho chojni romano;

19 co Judas Iscariote, tti joindačo para tse na Jesús.

Are ndaĉho chojni ixin Jesus chonda joachaxn Satans

(Mt. 12.22-32; Lc. 11.14-23; 12.10)

Cottimeja Jesus sacjoi ngain nchia tti vehe conixin cain chojni que vacao.

²⁰ Co nttiha anto tsje chojni atte in co onhi tiempo vechonda Jesus ni para joine conixin cain chojni que vacao.

²¹ Co are conohe niparient Jesus ixin quehe vanchehe, jehe na cjo i na para sarrojicao na Jesus ixin axaon na que Jesus ndajoinchetn sentidoe.

²² Cai canxion ximaestro e ley que joixin de ciudad de Jerusaln ndaĉho xa:

—X jihi chonda xa Beelzeb, tti ttetonha ngain cain espritu jianha, ixin jehe xa nchao ttetonha xa co dengui xa espritu jianha.

²³ Cottimeja Jesus vay cain chojni m co ndaĉho n ejemplo ngain na:

—Satans quen sengui ajeho Satans?

²⁴ Co si n gobierno chjea para tsetocaho ch, gobierno m choha tsonĉjenhe s

²⁵ co si n nindoha ngain nchia atto tteto na, cai tsonĉjenha.

²⁶ Co cai Satans si tseto jeho, cai tsonĉjenha s. Chonda que ndatsjexin.

²⁷ onhi quensen sixinhi ngaxinhi nchiandoha n x que anto tsanga para santsjehe cos xa que chonda xa ngaxinhi nchiandoha xa si tsiaha xa saho. Solo jam para nchao sasicao cos xa que j ngaxinhi nchiandoha xa.

²⁸ 'Anto ndoa tti rrondattjo ra: Cain chojni nchao sitjanehe cainxin cosa jianha que nchehe na co cainxin tti jianha que nichja na.

²⁹ Pero chojni que nichja jianha ixin Espíritu Santo, chojni mé nchoe sitjañeha, co cainxin tiempo sintteca na tti jianha mé.

³⁰ Jañá ndačo Jesús ngain na ixin jehe na ndačo na ixin Jesús vechonda espíritu jianha.

Janné Jesús co xanchó

(Mt. 12.46-50; Lc. 8.19-21)

³¹ Cottimeja cjoí janné Jesús conixin xanchó pero čhoha joixinhi na nchia ixin anto tsje chojni te ngain Jesús. Mexinxin tavintte na ndoja co coetonha na que rroquí ngain na.

³² Co chojni que tate ngaca Jesús ndačo na ngain:

—Janná co xanchó ndoja nttihi te na, co rinao na rronichjaha na jaha.

³³ Co Jesús ndačo:

—¿Quensen jannana, co quecá xanchian?

³⁴ Cottimeja Jesús tsjehe ngayehe cain nite ngandanji jehe co ndačo:

—Cain chojni tehe tti inchin jannana co jehe na tti inchin xanchian,

³⁵ ixin quexeho chojni que nchehe inchin rinao Dios, mé tti xanchian co mé tti jannana.

4

Ejemploe tti joiquenga trigo ngataon jngui

(Mt. 13.1-9; Lc. 8.4-8)

¹ Iná nchanho Jesús coexinhi cjoagoe chojni de ixin Dios ngandehe lago de Galilea, co xatte anto tsje chojni ngain Jesús nttiha. Mexinxin Jesús vengá ná barco que vehe nttiha ngataonhe jinda. Co cainxin chojni vittohe na ngandehe jinda.

² Cottimeja Jesús cjoagoe na anto tsje cosa de ixin ejemplo co cai ndačo janhi ngain na:

³ —Ttinhí ra tti rrondačhjan janha. Ná xí cjoí xa joiquenga xa trigo ngataon jngui.

⁴ Pero are jitja xa trigo ngataon jngui ttoha noanchjan de trigo vinttji ngá nttiha co joí conttoa co ndajoine va trigo mé.

⁵ Co icha noanchjan de trigo vinttji ngataha tti jí ttjao tti ttjinha jinche jí. Co trigo mé anto daca činhi ixin ttjinha jinche žanotaon.

⁶ Pero nchanho toin ndajoinchexema catrigo mé ixin tsjeha noehe ca vechonda ca.

⁷ Co icha noanchjan de trigo vinttji ngagaha canchaha. Co canchaha icha daca vangui ca co coančjandaha ca trigo vangui, co cain catrigo mé žonhi joinchekjian ca.

⁸ Pero icha noanchjan de trigo vinttji tti jian jinche, co trigo mé nchoe joanjo noa. Canxion nihi trigo mé joinchekjian de treinta noanchjan cada ninchjan, co icanxin trigo joinchekjian hasta sesenta noanchjan cada ninchjan, co icanxin trigo joinchekjian hasta cien noanchjan cada ninchjan.

⁹ Co ndačo Jesús ngain na cai:

—Žo nchao ttinxin ra, ttinhí ra jian.

*Quedonda Jesús joinchegonda tsje ejemplo
(Mt. 13.10-17; Lc. 8.9-10)*

¹⁰ Cottimeja are sacjoi cainxin chojni co jehó Jesús conixin tti tteyó chojni que vacao co icanxin ni ža vittohe nttiha, joanchiangui na ngain Jesús ixin quehe rročo ejemplo mé.

¹¹ Co Jesús ndačo ngain na:

—Jaha ra Dios ndačo ixin tsonoha ra tti jima de ixin queẁén ttetonha jehe. Pero janha nichja ngain chojni que čhjoia na jeho de ixin ejemplo.

¹² Jamé para que masqui dicon na tti nttaha pero inchin rroguiconha na, co masqui ttinhi na tti ndačhjan pero ttinxinha na, co para tsentoxinha vidé na ni sitjañeha na cain cosa jianha que nchehe na.

Jesús ndačo quehe rročo ejemploe tti joiquenga trigo

(Mt. 13.18-23; Lc. 8.11-15)

¹³ Ndačo Jesús ngain na cai:

—¿Attinxinha jaha ra quehe rročo ejemplo jihi? ¿Mexinxin queẁén tsinxin jaha ra icha ejemplo que janha rrondačhjan?

¹⁴ Tti coenga trigo, mé inchin tti ndačo joajné Dios ngain icha chojni.

¹⁵ Canxin chojni inchin tti trigo que vetsinga ngá nttiha, rročo ixin ttinhi na joajné Dios, pero Satanás ttí co ndanchetjañeha na palabra que coinhi na.

¹⁶ Icanxin chojni inchin tti trigo que vetsinga ngataha tti jí ttjao ixin are ttinhi na joajné Dios, anto čhjoin tonohé na dayé na joajna mé.

¹⁷ Pero inchin trigo que chondaha tsje noehe seha tončhjenhe trigo, jamé jehe chojni mé cai; cottimeja are tangui tonhe na co icha chojni feo nchehe ngain na ixin ditticaon na joajné Dios, jehe na ndadoan na desanimado.

¹⁸ Co icanxin chojni inchin tti trigo que vinttji ngagaha canchaha. Rročo que jehe na ttinhi na joajné Dios

¹⁹ pero icha xaxaon na cain problema que jehe na chonda na nttihi ngataha nontte, co tomi ncheyehe na para icha nchexoxinhi na cosa que jí ngataha nontte. Co cain yá ndanchetjanji joajna mé, co incheha na inchin ttetonha joajna jiji.

²⁰ Pero te icanxin chojni que ttinhi na joajné Dios co dayé na ngain ansén na co nchehe na inchin ttetonha joajna mé. Co cain chojni mé inchin tti trigo que vinttji tti jian jinche co joanjo tsje noatrigo. Canxion chojni mé inchin tti trigo que joinchechjian de treinta noa ngain nacoa ninchjan, co icanxin na inchin tti trigo que joinchechjian de sesenta co de cien noatrigo ngain nacoa ninchjan.

Ejemploe lámpara
(Lc. 8.16-18)

²¹ Cai ndačo Jesús:

—¿Apoco ná chojni sinchegacaon ná lámpara cottimeja tsema lámpara mé ngaxinhi ná cajón o ngangui saoen? Nahi, chonda que tsín lámpara ngataha ná cosa noi para nchao sinchengasán ngaxinhi nchia.

²² xonhi cosa jima que tsononxinha, co xonhi cosa jima que te xaxaon ni ngain ansén ni que chojni tsonoeha; cain cosa chonda que tsononxin cosa.

²³ Jaha ra que ttinxin ra, ttinhi ra jian.

²⁴ Cai ndačo Jesús:

—Ttjiho ra cuidado tti tsinhi ra. Inchin medida que jaha ra dattechoaxin ra, Dios jamé sattechoha jaha ra cai. Co Dios rrochjá ra icha, jaha ra xo ttinxin ra.

²⁵ Ixin chojni que chonda, Dios tsjenguijna na para rrochonda na icha, pero chojni que xonhi chonda, Dios santsjehe cainxin tti jehe na chonda na masqui tsjeha chonda na.

Ejemplo de quexén dangui jino

²⁶ Ndačo Jesús cai:

—Tti ttetonha Dios inchin noa que ttenga chojni ngataon jngui.

²⁷ Chojni ttenga co sacjan dinttejoa, cottimeja dingattjen co jamé datto ttie co datto nchanho. Co noa čhintaon noa co čhinhi jino pero tti jnguihi noeha quexén dangui jino mé.

²⁸ Ixin nontte nchegangui jino mé. Saho čhinhi chán jino cottimeja ntté, cottimeja noa.

²⁹ Co are ocha noa mé ngain ní co ndaxema ní jian, ovittja tiempo para tsanda na ní mé.

Ejemploe ná tsé que dinhi mostaza

(Mt. 13.31-32; Lc. 13.18-19)

³⁰ Cai ndačo Jesús:

—¿Quehe cosa nchao sinttacaninxin tti ttetonha Dios?

³¹ Mé inchin ná tsé icha nchín de cainxin tsehe ca co tsé mé dinhi mostaza.

³² Pero are dinga tsé mé, dangui qué tse icha que cainxin ca hasta conttoa nchao nchejogaha va ngagaha ntté ca mé.

Quexén vanchegonda Jesús cain ejemplo

(Mt. 13.34-35)

³³ Jañá vacjago Jesús joajné Dios conixin tsje ejemplo inchin cain ejemplo yá, hasta tti, chojni nchao coinxin jian.

³⁴ Jesús jeho nichjé chojni de ixin ejemplo, pero después, vandache chojni que vacao tti rrocho cainxin ejemplo yá.

Jesús tajoaquehe čhintto conixin olé lago

(Mt. 8.23-27; Lc. 8.22-25)

³⁵ Nchanho mé are ndaconttie, Jesús ndache chojni que vacao:

—Sachjin na toenxin lago jihi.

³⁶ Cottimeja nttiha cointtohe na cainxin chojni co sajoicao na Jesús ngá barco tti vengá. Co rroé icanxin barco cai.

³⁷ Co jói ná čhintto anto soji ngataon jinda; anto soji coeto nda co viquia nda barco tti jidicao Jesús.

³⁸ Co are mé Jesús tajicjon ná almohada tajjioa ngá barco ngain ná lugar noton barco, co chojni que vacao Jesús joinchexingamehe na co ndačo na ngain jehe:

—¡Maestro! ¿Andosanha ixin ndatexincanjingui na jinda?

³⁹ Cottimeja vingattjen Jesús, co joinchesattehe čhintto co jinda co ndačo ngain:

—¡Tenco! ¡Co tadarihi ndacoa!

Co rato mé tavehe čhintto ndacoa co tavehe jinda ndacoa.

⁴⁰ Cottimeja ndačo Jesús ngain chojni que vacao:

—¿Quedonda anto řaon ra? ¿Quedonda řa chon-daha ra confianza ngain Dios?

⁴¹ Pero jehe na anto řaon na, co jeho na ndache chó na:

—¿Quensen jihi que hasta čhintto co jinda ditti-caon tti jehe ndačo?

5

Tti xí de ngain nonttehe Gadara que vechonda espíritu jianha

(Mt. 8.28-34; Lc. 8.26-39)

¹ Joiji na toenxin lago mé, ngain nonttehe Gadara.

² Co are Jesús vačhjexin de ngá barco, joí ngain Jesús ná xí que vechonda espíritu jianha.

³ Xí mé vehe ngaxinhi tti vařanguindehe na chojni que ndavaguenhe tiempo mé. Co řonhi chojni coixinhi coia xa masqui conixin cadena.

⁴ Tsje nttiha are icha saho chojni řa vaquixinhi na vaquiixin na xa cadena rotté xa co rá xa, pero cainxin tiempo jehe xa vaconřhintaon xa cadena co vagaña xa cadena. Co iřonhi chojni vaquixinhi ngain xa.

⁵ Co cain tti vacji xa ngagaha jna co ngaxinhi tti vařanguindehe na chojni que ndavaguenhe puro vacoyao xa ttie co nchanho, co vanchenihi nntaohe xa conixin řo.

⁶ Pero are vicon xa Jesús řa cjion, jehe xa coinga xa joí xa ngain Jesús co vettoxin nntajochjihi xa ngattoxon con Jesús;

⁷ co ndačo xa sén:

—¿Quedonda dixintte nganji, jaha Jesús, Xenhe Dios que ttjen ngajni? Conixin nombré Dios nntat-sanha ñao que ncheguetanha na tangui janha.

⁸ Ndačo jañá ixin Jesús ojindačo ngain:

—¡Jaha espíritu jianha, sattjixin de ngain xí jihi!

⁹ Co Jesús joanchiangui co ndačo:

—¿Queřen dinhi jaha?

Co jehe espíritu jianha ndačo:

—Janha dinhi na Legión ixin janha na anto tsje na.

¹⁰ Co espíritu jianha anto joinchetsenhe ñao Jesús ixin senguixinha de ngain región mé.

¹¹ Co ixin nttiha vintte anto tsje cocochi vajinea va chiaon rotté ná jna,

¹² mexinxin cain espíritu jianha joinchetsenhe ñao Jesús co ndaço:

—Rroanha ni ra ngain cocochi taha co tančhanda ni ra sixinhi na ngaxinhi va.

¹³ Cottimeja Jesús joanjo joachaxin, co cain espíritu jianha mé vačhjexin de ngaxinhi xí mé, co sajoixinhi ngaxinhi cocochi. Nttiha vintte inchin yó mil cocochi, co cainxin cocochi mé ndavint-tecoloco va co coinga va xincanji va ngain lago co nttiha joingui va jinda co ndavintteguenxin cainxin va ixin vinttecjonhe va jinda.

¹⁴ Cottimeja cain chojni que vaquingaria cocochi mé xäon na co coinga na joiquequín na chojni ngagaha rajna co icha chojni que vintte ngataon jngui. Co cjoí chojni mé joitsjehe na quehe conhe.

¹⁵ Co are joiji na tti jí Jesús, vicon na tti xí que vechonda tsje espíritu jianha ojingá xa lonttoe xa co tají xa ndacoa. Co jehe na are vicon na mé, anto xäon na.

¹⁶ Co cain chojni que vicon coequin na quexén conhe tti xí que vechonda tsje espíritu jianha co quexén conhe cain cocochi.

¹⁷ Cottimeja cain na coexinhi na joinchetsenhe na ñao Jesús que satsjixin de ngain nonttehe na.

¹⁸ Are Jesús coani barco, tti xí que vechonda tsje espíritu jianha joinchetsenhe ñao Jesús ixin rrocji ngain Jesús cai.

¹⁹ Pero Jesús čhoha, co ndačo:

—Sattji para nchiandoi co diquequinhi cain ni ichó cainxin tti joinchehe Dios nganji, co quežén coiaconoaha.

²⁰ Cottimeja tti xí mé sacjoi co joiquequín chojni que vintte regioen Decápolis cainxin tti joinchehe Jesús ngain jehe. Co cainxin chojni que coinhi, goan na admirado.

Are xingamehe xannčhichjenhe Jairo conixin ná nčhí que catte lonttoe Jesús

(Mt. 9.18-26; Lc. 8.40-56)

²¹ Co are Jesús cjan toenxin lago iná conixin barco, cjoi anto tsje chojni ngain Jesús, co jehe nttiha tavehe ngandehe jinda.

²² Cottimeja joí ná xí que vaquetonha xa ngain nihngo nttiha, co vinhi xa Jairo. Are Jairo joí, vettoxin nttajochjihi ngain Jesús,

²³ co anto joinchetsenhe ñao Jesús co ndačo:

—Xannčhichjanhna ndajidenhe xan. Nttat-sanha ñao, chjín na co ttín rá ngataha xan para rroxingamehe xan co sechon xan icha.

²⁴ Cottimeja sajoicao xí mé Jesús. Pero anto tsje chojni cjoi cai co anto conttedo na ngaca Jesús.

²⁵ Co ngacjén chojni mé vehe ná nčhí que venihi nča; ovechonda tteyó nano que veguenguihi nča jni.

²⁶ Co anto tsje ngain xinchežoan cjoi nča pero žonhi žoan vittja. Ojoexin joinchexinhi nča

cainxin tti vechonda n̄cha, pero icha co icha venihi n̄cha.

²⁷ Co are coinhi n̄cha ixin Jesús vanchexingamehe tsje chojni, conchiennehe n̄cha ngacjén chojni co jimao catte n̄cha lonttoe Jesús,

²⁸ ixin vaʒaxaon n̄cha co vandačo n̄cha: “Si rrocatte masqui jeho lonttoe Jesús, janha rrox-ingamana.”

²⁹ Co are n̄chí mé catte n̄cha lonttoe Jesús, rato mé tavehe jni que jeha n̄cha vechonda n̄cha. Co conohe n̄cha ngain cuerpoe n̄cha ixin on-daxingamehe.

³⁰ Cottimeja Jesús conohe ixin ná chojni ojoinchegonda joachaxin que chonda Jesús. Mexinxin ngaria Jesús co tsjehe ngayehe chojni co joanchiangui co ndačo:

—¿Quensen catte lonttona?

³¹ Cottimeja chojni que vacao Jesús ndačo na:

—Soixin dicon que anto tsje chojni tonttedo na ngaca soixin, mexinxin quedonda soixin danchi-angui: “¿Quensen catte?”

³² Pero Jesús tsjehe ngayehe na para rroguicon quensen catte lonttoe.

³³ Cottimeja n̄chí mé onoha quehe conhe, co jixanga n̄cha de ixin joaxaon cjoí n̄cha vettoxin nttajochjihi n̄cha ngain Jesús, co ndačo n̄cha ixin quehe joinchehe n̄cha.

³⁴ Cottimeja Jesús ndačo ngain n̄chí mé:

—Jaha oxingamaha ixin vitticaon na. Sattji contenta ixin irrocjanha tsoniha de ixin chin que jaha joarichonda.

³⁵ ʒa jinichja Jesús jañá are joí canxion chojni de ngain nchiandoha Jairo co ndačo na ngain Jairo:

—Xanha ondavenhe xan. Inchemolestaha xi-maestro.

³⁶ Pero Jesús joincheha caso tti ndačo na, co ndačo Jesús ngain Jairo:

—Xaonha; jeho ditticaon na janha.

³⁷ Co sajoicao Jairo Jesús ngain nchiandoha pero Jesús čhoja joicao tsje chojni, jeho Pedro, Jacobo co Juan xanchó Jacobo.

³⁸ Co are joiji na ngain nchiandoha Jairo, cainxin chojni que te ntiha anto tetsjanga na co tetoyao na.

³⁹ Jesús joixinhi co ndačo ngain na:

—¿Quedonda anto toyao jaha ra co tsjanga ra? Xannčhichjan ndavenha xan, jeho tajijoa xan.

⁴⁰ Pero jehe na cjoanoa na Jesús. Cottimeja Jesús ndache cain chojni mé que vačhjexin na de nchia. Co jeho Jesús conixin ndodé xannčhichjan co janné xan conixin tti ní chojni que joicao Jesús joixinhi na tti jí xannčhichjan mé.

⁴¹ Co Jesús tsehe rá xan co ndačo ngain xan:

—Talita, cumi —que rročo: Xannčí, janha rrondattjo, dingattjen.

⁴² Co rato mé, jehe xannčhichjan mé, que vechonda tteyó nano, vingattjen xan co nchao sacjoixin rotté xan. Co cain chojni ntiha anto goan na admirado.

⁴³ Pero Jesús anto coetonhe na ixin xonhi chojni rrondache na de ixin tti joinchehe Jesús. Co ndačo Jesús cai ixin rrochjé na xannčhichjan mé sine xan.

6

Jesús ngain Nazaret (Mt. 13.53-58; Lc. 4.16-30)

¹ Cottimeja Jesús conixin chojni que vacao sacjoixin na de nttiha co sacjoi na para Nazaret, rajné Jesús.

² Co are joí nchanho para nchejogaha chojni Israel, Jesús coexinhi cjoagoe na de ixin Dios ngaxinhi nihngo. Co tsje chojni tti coinhi quehe nichja Jesús goan na admirado co ndačo na:

—¿Ttinó coanguixin xí yá cainxin cosa yá? ¿Quečén xí yá anto jian chonxin de ixin Dios, co quečén nchehe xa anto tsje milagro?

³ Xí yá tti carpintero, xenhe María co xanchó xa Jacobo, José, Judas co Simón; co cai cain xanchó xa xannčí nttihi te xan ngain rajná na.

Mexinxin čhoha na joinchehe na caso tti ndačo Jesús.

⁴ Pero Jesús ndačo ngain na:

—Cainxin chojni nchesayehe ná profeta, pero nahi profeta que ttixin de ngain řajeho rajné na ni profeta que ttixin de ngain řajeho familié na ni de ngain řajeho nindoha na.

⁵ Mexinxin Jesús čhohaha joinchexingamehe tsje chojni nttiha. Pero Jesús catte nchion chojni nttiha co jehe na xingamehe na.

⁶ Co Jesús goan admirado ixin chojni nttiha čhoha na vitticaon na ngain jehe. Cottimeja Jesús coingaria icanxin rajna que te chiaon para joicjagoe chojni de ixin Dios.

Jesús rroanha chojni que vacao para joinichja na de ixin Dios

(Mt. 10.5-15; Lc. 9.1-6)

⁷ Cottimeja nichja ngain tti tteyó chojni que vacao co rroanha yó co yó na ngain icha rajna para joinichja na de ixin Dios. Co jehe Jesús joanjo joachaxin ngain na cai para sengui na espíritu jianha que te ngain chojni.

⁸ Co coetonha ngain na cai que xonhi sicao na ngoixin tti satsji na, ni ná bolsa, ni niottja, ni tomi. Jeho sicao na nttacotto para tsjixin na are tsonchjen na co

⁹ catte corriente tsjanga na co sinttengá na nanacoa camisa, čoha sinttengá na yoyó camisa.

¹⁰ Co ndačo Jesús ngain na cai:

—Are saso ra ná nchiandoha na co jehe na rrondačo na ixin nchao tasintte ra nttiha, jaha ra tadintte ra nttiha hasta que satsjixin ra de ngain rajna mé.

¹¹ Co si čonja rajna sinaoha na sayaha ra na ni sinaoha na tsinhi na tti rronichja ra, dačhjexin ra de nttiha co tontsjenga ra jinche que jiyá cattea ra. Jamé para ná señal ixin vitticaonha ra na. Co ndattjo ra que are tsí nchanho que Dios sinchejusivehe cainxin chojni, are mé, seguro que chojni que vintte ngain ciudad Sodoma co Gomorra icha sojiha castigo sayé que cain chojni ngain rajna tti rročhoha sayaha ra.

¹² Cottimeja savinttecji chojni que vacao Jesús ngain tsje rajna co ndache na cain chojni ixin chonda na que tsentoxinhi vidé na.

¹³ Co cai venguixin na tsje espíritu jianha de ngaxinhi cuerpoe chojni, co coinga na

aceite ngataha já tsje chojni nihi, co jamé joinchexingamehe na na.

*Are ndavenhe Juan, tti vancheguitte chojni
(Mt. 14.1-12; Lc. 9.7-9)*

¹⁴ Are ngoixin mundo venohe quehe vanchehe Jesús, cai rey Herodes conohe co ndačo:

—Juan tti vancheguitte chojni cjan xechon, mexinxin chonda cain joachaxin yá.

¹⁵ Co icanxin chojni vandačo:

—Mé tti profeta Elías.

Co icanxin chojni vandačo:

—Mé ná profeta inchin cain profeta que vacji are saho.

¹⁶ Pero are Herodes coinhi cain yá, jehe ndačo:

—Jehe seguro Juan, tti janha coetonha para činji já, co jai xechon.

¹⁷ Are saho Herodes coetonha para joicao na Juan viaxinhi co coia na conixin cadena ngaxinhi cárcel ixin ná naníta vinhi Herodías ndačo jamé. Jehe Herodías cjoičihi Felipe, xanchó jehe Herodes, pero Herodes joantsjehe xanchó čihi xan para vecaho jehe Herodes.

¹⁸ Co are mé Juan ndačo ngain Herodes:

—Jianha ixin jaha rricoho čihi xanchó.

¹⁹ Mexinxin jehe Herodías anto goñao ngain Juan ixin ndačo Juan jañá, co joinao narrogoenxon Juan. Pero čhoha joinchehe mé

²⁰ ixin Herodes venohe que Juan anto jian ngain ansén co vaguitticaon ngain Dios. Mexinxin vañaon Herodes para narrogoenxon Juan, co coančjandaha Herodes Herodías para cjoaya ngain Juan. Co masqui Herodes antoha jian

vaquinxin tti vandaçho Juan, pero jehe ján vaji-nao vaquinhí.

²¹ Pero are quié Herodes, Herodías nchao co-tonha para ndavenhe Juan. Ixin are mé Herodes vechonda ná vandango. Co jehe joanjo joine tsje xí que vaquetonha ngain regioen Galilea, co tsje xí que vaquetonha ngain xisoldado, co icha chojni importante nttiha.

²² Co ná xannchí xenhe Herodías joixinhi xan co tte xan ngaxinhi nchia tti tenexin cainxin chojni mé. Herodes co icha chojni que tenecaho nttiha anto joincheçoxinhi na ixin queçén tte xannchí mé. Mexinxin Herodes ndaçho ngain xannchí mé:

—¿Quehe cosa rinao? Danchiana co janha rroch-jaha.

²³ Co jehe Herodes ndaçho co joinchejurá ixin sanjo quexeho cosa sanchia xannchí mé masqui hasta ngosinexin región que jehe vaquetonha.

²⁴ Jehe xan vaçhje xan co ndaçho xan ngain janné xan:

—¿Quehe sanchiá rey?

Co janné xan ndaçho:

—Danchiehe rey já Juan tti ncheguitte chojni.

²⁵ Co jaicoa cjan xan joixinhi xan tti jí rey co ndaçho xan ngain:

—Janha rinaho que jai rrochjana já Juan ngá ná láto.

²⁶ Cottimeja rey anto vechín. Pero ixin jehe ojoinchejurá ixin sanjo tti sanchia xan, co ixin coinhi cain chojni que te ngain, mexinxin jehe joinaoha ndache xannchí mé nahi.

²⁷ Co rato mé coetonhe Herodes ná xisoldado para joiroé xa já Juan.

²⁸ Cjoi xisoldado mé ngain cárcel tti jiaxinhi Juan co cončhinjihi xa já co ngá ná láto joiaoxin xa co joanjo xa ngain xannčí, co jehe xan joanjo xan ngain janné xan.

²⁹ Co are cain chojni que vacao Juan conohe na quehe conhe, joí na co sajoicao na cuerpoe para joicjavá na cuerpo.

*Are Jesús joanjo joine naho mil xí
(Mt. 14.13-21; Lc. 9.10-17; Jn. 6.1-14)*

³⁰ Are nirepresentanté Jesús joixin na de ngain cain rajna tti sacjoi na, cjan na para ngain Jesús, co ndačo na quehe joinchehe na, co quehe cjoagoe na chojni ngoixin tti cjoi na.

³¹ Cottimeja Jesús ndačo ngain na:

—Xácoi ra, chjin na dinttojogaha na ná lugar tti xonhi chojni jí.

Jesús ndačo jañá ixin vacji co vacjan anto tsje chojni ngain na, co ni tiempo vechondaha na para vane na.

³² Cottimeja jecho Jesús conixin nirepresentanté sacjoi na ngá barco para iná lugar tti xonhi chojni vintte.

³³ Pero anto tsje chojni vicon are sacjoi co joatsoan na Jesús. Mexinxin anto tsje chojni de tsje rajna coinga na joichonhe na nttiha co icha saho joiji cain jehe na que Jesús.

³⁴ Co are Jesús vačhjexin de ngá barco, vicon anto tsje chojni nttiha iná, co Jesús coiaconoehé na ixin jehe na sín na nttiha xá coleco que xonhi chojni ttingaria. Co Jesús coexinhi joinchecoehé na nttiha tsje cosa de ixin Dios.

³⁵ Co are ocotsocjin chojni que vacao Jesús joí na ngain co ndačo na:

—Otsocjin co nttihi xonhi nchiandoha chojni te.

³⁶ Ttetonhe cain chojni satsji na tti jí nchia o rajna icha chian para siquehna na tti sine na, ixin xonhi chonda na.

³⁷ Co Jesús ndačo:

—Jaha ra danjo ra tti sine na.

Co jehe na ndačo na:

—¿Quexén janha na tsji na siquehna na niottja para sine cainxin chojni yá? Ixin tomi que sitte cain niottja que sine cain chojni yá inchin tsjexin tomi que dacha ná ninchehe xa yáto conittjao.

³⁸ Co Jesús ndačo ngain na:

—¿Quejanhi niottja chonda ra? Sattji ra ditsjehe ra.

Co are jehe na conohe na quejanhi niottja techonda na, joí na co ndačo na ngain Jesús:

—Jí naho niottja co yó copescado.

³⁹ Cottimeja Jesús coetonhe cainxin chojni para tavintte na grupochjan co grupochjan ngataha cachji.

⁴⁰ Co tavintte na de cien na co de cincuenta na ngataha cachji.

⁴¹ Cottimeja Jesús coá tti naho niottja co tti yó copescado co tsjehe para noi co chjé gracias ngain Dios. Cottimeja váña niottja co copescado co chjé chojni que vacao para conchjejehe na cainxin chojni.

⁴² Co cainxin chojni joine na co cojehe na jian.

⁴³ Cottimeja xa joinchecaon na tteyó ntaxa de tti xexin joine na, de niottja co copescado.

44 Co jecho xí que joine niottja mé cjoí naho mil xa.

Jesús cjoixin rotté ngataonhe jinda
(Mt. 14.22-27; Jn. 6.16-21)

45 Cottimeja Jesús coetonhe chojni que vacao para coani na barco co coattoa na lago para sacjoi na ngain rajna Betsaida icha saho que jehe. Co Jesús vittohe nttiha para jindache chojni que onchao sasintteci na.

46 Co are cainxin chojni sacjoi, Jesús sacjoi para ngagaha ná jna para joinchecoanxinxin Dios.

47 Co are ondacontie, barco ojoiiji ngosine jinda, co vé jecho Jesús vittohe nttiha.

48 Co Jesús vicon ixin anto tangui tedeca na barco ixin čhintto anto soji joixin čhintto de tti satettji na. Co ndoyo mé Jesús coingachjetaha jinda co sacjoi hasta tti ngain na co jehe joinchehe inchin rrogatto nao.

49 Pero are jehe na vicon na Jesús sajittji conixin rotté ngataonhe jinda, jehe na řaxaon na ixin mé ná nttanchanha, co coyao na

50 ixin cainxin na vicon na co anto řaon na. Pero Jesús nichja ngain na co ndačo:

—Řaonha ra, janha joihi.

51 Co coani barco tti tengá na, co rato mé tavehe čhintto. Jehe na anto řaon na co anto goan na admirado

52 ixin řa coinxinha na quehe rročo tti joinchehe Jesús conixin niottja. Ixin řa cha ansén na.

Jesús joinchexingamehe tsje chojni nihi ngain nonttehe Genesaret
(Mt. 14.34-36)

⁵³ Coattoa na lago mé co joihi na nonttehe Gensaret. Co nttiha coenchoa na barco ngandehé jinda.

⁵⁴ Co are vaniáxin na de barco, chojni que te nttiha anto daga joatsoan na Jesús.

⁵⁵ Co anto daga joinchenohe chó na ngoixin región nttiha. Co cainxin lugar tti sacjoi Jesús, joícao na ninihi conixin camilla ngain Jesús.

⁵⁶ Co ngoixin tti vacji Jesús ngain colonia o ngain ranchería o ngagaha rajna, chojni vaquín na ninihi ngá nttiha co vanchetsenhe na ñao Jesús ixin sittoexin que ninihi rrotse na masqui rioho ngandehé lonttoe Jesús. Co cainxin chojni que tse lonttoe Jesús xingamehe na.

7

Tti nchejianha chojni

(Mt. 15.1-20)

¹ Co conchienne canxion xifariseo ngain Jesús conixin icanxin ximaestroe ley Israel que joixin de ngain ciudad de Jerusalén.

² Chojni mé vicon ixin canxion chojni que vacao Jesús vaconttiha na jinda rá na tsje nttiha are vane na inchin ttetonha costumbré na. Mexinxin xifariseo co ximaestroe ley feo nichja xa de ixin chojni que vacao Jesús.

³ (Jamé ixin cain xifariseo co icha chojni Israel anto vaguitticaon na co vanchehe na costumbré cain ndogoelitoe na xančhjen are icha saho. Rrocho que cainxin tiempo vacontti na jinda rá na tsje nttiha saho de vane na.

⁴ Co are vaquixin na ndásin co si vaconttiha na jinda rá na tsje nttiha saho, vajineha na. Cai

vechonda na tsje costumbre icha, inchin queñén vacjén na taza co chi co traste de chia co saoen na.)

⁵ Cottimeja joanchiangui na ngain Jesús co ndačo na:

—¿Quedonda chojni que čhjiho ditticaonha na costumbré ndogoelitoa na žančhjen? Ixin jehe na tonttiha na jinda tsje nttiha saho que jine na.

⁶ Cottimeja Jesús ndačo ngain na:

—¡Jaha ra chojni que ncheha inchin ndačo! Mexinxin nchao diquentaxin Isaías janhi de ixin jaha ra:

Chojni tehe nchesayana na conixin rroha na, pero ngain ansén na ža icjin te na para sino na na janha.

⁷ Mexinxin žonhi žé masqui tenchecoanxinna na ixin tti jehe na tenchecoenhe na chojni joxon tti ttetonha xí nttihi ngataha nontte.

⁸ Jihi ndoa de ixin jaha ra ixin jaha ra ditticaonha ra tti ttetonha Dios sino que nchehe ra inchin ndačo costumbré ndogoelitoa ra žančhjen. Rročo costumbre de queñén ttjén ra vaso co chi co icha costumbre inchin mé.

⁹ Co Jesús ndačo ngain na cai:

—Jaha ra coín ra ná lado tti ttetonha Dios para nchao nchehe ra inchin ndačo costumbrea ra.

¹⁰ Ixin ley que vayé Moisés ndačo: “Ttjiho ra respeto ngain ndodá ra co ngain janná ra”, co “Tti rronichja jianha ngain ndodé o ngain janné, chojni mé jiquininxin ndasenhe.”

¹¹ Pero jaha ra ndačo ra ixin ná chojni nchao rrondache ndodé o janné: “Janha čhoha tsjenguijna soixin ixin cain tti janha chonda, mé Corbán”

(co jihu rroĉho ixin jehe ojoanjo cain mé ngain Dios).

¹² Co si ná chojni ndaĉho jañá, jaha ra itanĉhlandaha ra para tsjenguijna ndodé o janné.

¹³ Co jañá jaha ra incheha ra caso tti ttetonha Dios, sino que jehó nchehe ra inchin costumbre que vayehe ra de ngain ndogoelitoa ra co tti jaha ra nchecoenhe ra xanha ra jai. Co nchehe ra icha cosa jianha inchin jihu cai.

¹⁴ Cottimeja Jesús nichjé cainxin chojni iná co ndaĉho ngain na:

—Ttinhí ra jian cainxin tti janha rrondaĉhjan co ttinxin ra.

¹⁵ Jehá tti jine chojni nchejianha na. Tti ttixin ansén chojni, mé tti nchejianha chojni.

¹⁶ Jaha ra que ttinxin ra, ttinhí ra jian.

¹⁷ Cottimeja Jesús cjan sajoixinhi nchia, co are Jesús ngaxinhi nchia, chojni que vacao Jesús joanchiangui na ngain jehe ixin quehe rroĉho ejemplo mé.

¹⁸ Co Jesús ndaĉho ngain na:

—¿Acai jaha ra ttinxinha ra? ¿Attinxinha ra que jehá tti jine chojni nchejianha na?

¹⁹ Tti jine chojni ttijha ngaxinhi ansén. Cain mé sattji ngaxinhi tsehe, cottimeja chonda que daĉhje.

Jañá rroĉho que chojni nchao jine cain cosa.

²⁰ Co ndaĉho Jesús cai:

—Tti ttixin de ngain ansén chojni, mé tti nchejianha na.

²¹ Ixin de ngaxinhi ansén na daĉhjexin cosa jianha que jehe na ģaxaon na: jehe na ģaxaon

na para sincheyehe na čihi iná tattíta, co para nasoenxon na chojni,

²² co para tsé na cosé iná chojni. Co ixin jianha řaxaon na, cai jehe na rinao na rrochonda na cosé icha chojni, co nchehe na cosa jianha, co ncheyehe na icha chojni, co tosoeha na para nchehe na tti jianha, co chjoehe na, co nichja na ndoaha de icha chojni, co anto orgulloso na, co ncheha na jian ngain icha chojni.

²³ Cainxin cosa jianha yá ttixin de ngaxinhi ansén na co nchejianha na.

*Ná nčhí de iná nación que vitticaon nčha Jesús
(Mt. 15.21-28)*

²⁴ Cottimeja sacjoixin Jesús de nttiha co sacjoi ngain region tti te ciudad de Tiro co Sidón. Co are Jesús joiĵi nttiha vittja ná nchia para vittohe. Pero joinaoha ixin rroconohe chojni ttinó vehe jehe. Pero masqui jamé, chojni conohe na ttinó vehe Jesús.

²⁵ Co ngain región mé vehe ná xannčhí que ve-chonda xan espíritu jianha. Co anto daca conohe janné xan ixin nttiha vehe Jesús. Co cjoĵi naníta mé tti vehe Jesús co vettoxin nttajochĵihi ngain Jesús.

²⁶ Naníta mé jeha judía, jehe joixin iná nación dinhi Sirofenicia. Pero joinchetsenhe ñao Jesús ixin Jesús santsjexin espíritu jianha de ngain xenhe naníta mé.

²⁷ Pero Jesús ndačho ngain naníta mé:

—Tajanda que saho tsjenguijna chojni judío que mé chojni Dios. Ixin nchaoha jí si ná ndodaha santsjehe ndo xenhe ndo niottja para rrochĵé ndo conia nio.

²⁸ Cottimeja naníta mé ndačho ngain Jesús:

—Ján, ndoa, pero conia que te ngangui mesa nchao jine va tti nchoe niottja que ttinttjingu chjan.

²⁹ Cottimeja ndačo Jesús:

—Ján, nchao ndačo jaha. Onchao sattji jaxon ixin espíritu jianha osacjoixin de ngain xanha.

³⁰ Co are naníta mé joiji nchiandoha, vittja xenhe ngataha saon tají xan co espíritu jianha que vechonda xan icoha; osadicjixin de ngain xan.

Jesús joinchexingamehe ná tti čhoha vanichja ni čhoha vaquinhi

³¹ Cottimeja Jesús sacjoixin de ngain región tti jí ciudad de Tiro co vatto ngain ciudad de Sidón co tti rajna que te regioen Decápolis, hasta que joiji ngain lago de Galilea.

³² Co nttiha joiaohe na Jesús ná xí que čhoha vaquinhi co čhoha vanichja. Co joinchetsenhe na ñao Jesús ixin tsín rá ngataha xí mé, para rrox-ingamehe.

³³ Cottimeja Jesús vačhjendacaho xí mé de ngayehe chojni, co xandoho dedoe ngadoho ndatsjoen xa co chjé nttatté dedoe co cattehe neje xa.

³⁴ Cottimeja tsjehe Jesús para ngajni, co váva soji co ndache xa:

—¡Efata! —que rročo: ¡Xirehe!

³⁵ Co xiré ndatsjoen xa co onchao coinhi xa co onchao nichja xa jian.

³⁶ Co Jesús coetonhe cain chojni nttiha ixin rrondačhoha na quehe joinchehe Jesús. Pero masqui Jesús anto vaquetonhe na ixin rrondačhoha na, jehe na icha vaquequin na.

37 Co chojni mé anto vagoan na admirado co vandačo na:

—¡Cainxin nchao nchehe! Ixin hasta chojni que ttinha, jehe nchao nchequinhi co chojni que čhoha nichja, jehe nchao nchenichja.

8

Are Jesús joanjo joine nó mil chojni (Mt. 15.32-39)

1 Co tiempo mé xatte anto tsje chojni ngain Jesús iná co vechondaha na tti vane na nttiha. Mexinxin Jesús nichjé chojni que vacao co ndačo ngain na:

2 —Janha nchenina chojni tehe, ixin ochonda ní nchanho te na nttihi nganji na co xonhi chonda na para sine na.

3 Si rrondattjan na ixin satsji na para nchian-doha na co sineha na icha saho, ndatsončhjenxin na jintta co ndatsonttiehe na ngatja nttiha, ixin canxion na joixin na cjin.

4 Co chojni que vacao Jesús ndačo na:

—¿Pero quežén rrochjé na cain chojni yá sine na? Nttihi xonhi jí.

5 Jesús joanchiangui ngain na co ndačo:

—¿Quejanhi niottja chonda jaha ra?

Co jehe na ndačo na:

—Yáto niottja.

6 Cottimeja Jesús coetonhe cainxin chojni tavintte na ngataha nontte. Cottimeja coá tti yáto niottja mé co chjé gracias ngain Dios. Cottimeja váña Jesús nio co chjé chojni que vacao nio para que jehe na conchjea na nio ngain icha chojni.

7 Cai vechonda na icanxin copescadochjan, co Jesús chjé gracias ngain Dios co chjé chojni que

vacao para que jehe na conchjeyehe na chojni para joine na.

⁸ Cainxin na joine na co cojehe na jian. Cottimeja xa joinchecaon na yáto nntaxa de tti xexin joine na.

⁹ Co cain chojni que joine mé, chian nó mil chojni. Cottimeja Jesús goan despedido de ngain cain chojni mé,

¹⁰ co jehe conixin chojni que vacao vinttengá na barco co sacjoi na para nonttehe Dalmanuta.

Xifariseo joanchia xa ixin Jesús rrojinchehe ná milagro

(Mt. 16.1-4; Lc. 12.54-56)

¹¹ Co are joiji na nttiha, conchienne canxion xifariseo ngain Jesús co joinchediscutihi xa Jesús. Co ndačo xa ixin Jesús rrojinchehe ná cosa para rrocjago ixin joachaxin que jehe chonda joixin de ngajni.

¹² Cottimeja Jesús váva soji co ndačo:

—¿Quedonda chojni que techon jai rinao sicon ná señal de milagro? Janha seguro rrondachjan que ni ná señal tsjagoaha na.

¹³ Cottimeja nttiha cointtohe xa co Jesús cjan vengá barco co sacjoi conixin chojni que vacao para toenxin lago.

Levaduré xifariseo

(Mt. 16.5-12)

¹⁴ Co chojni que vacao Jesús ndatjañehe na joicaoha na niottja para rrojine na. Co are ongá barco jeho nacoa niottja techonda na.

¹⁵ Cottimeja Jesús coetonhe na co ndačo:

—Ttjiho ra cuidado de ixin levaduré xifariseo, co levaduré Herodes.

¹⁶ Co cain chojni que vacao Jesús ndache chó na:

—Jehe ndačo jañá ixin xonhi niottja chonda na.

¹⁷ Pero Jesús chonxin quehe ndache chó na co ndačo ngain na:

—¿Quedonda tendačo ra ixin xonhi niottja chonda ra? ¿Axa ttinxinha ra, ni xa noaha ra? ¿Achonda ra ansean ra anto cha?

¹⁸ Masqui dicon ra co ttinhi ra, pero xa ttinxinha ra. ¿Achoha xaxaon ra de ixin tti naho niottja?

¹⁹ Are janha váña tti naho niottja para joine tti naho mil xí, ¿quejanhi nntaxa joinchecaon ra de tti xexin joine na?

Cottimeja chojni que vacao Jesús ndačo na:

—Tteyó nntaxa.

²⁰ Cottimeja ndačo Jesús iná:

—Co are janha váña tti yáto niottja para joine tti nó mil chojni, ¿quejanhi nntaxa joinchecaon ra de tti xexin joine na?

Co chojni que vacao Jesús ndačo na:

—Yáto nntaxa.

²¹ Cottimeja Jesús ndačo ngain na:

—¿Aco xa ttinxinha ra ni xa noaha ra tti janha ndattjo ra?

Jesús ngain rajna Betsaida joinchexingamehe ná tti vaguiconha

²² Cottimeja joihi na ngain rajna Betsaida. Co canxion chojni nntiha joiaho na ngain Jesús ná xí que choha vaguicon. Co joinchetsenhe na ñao Jesús para rrocate co rrojinchexingamehe.

²³ Mexinxin Jesús tsehe rá xí mé co sajoicao para ngandehe rajna mé. Co nntiha Jesús cjoatjo nntatté ngain jmacon xa co vaquehe rá ngataha xa, co joanchianguihi xa si aonchao dicon xa.

²⁴ Co jehe xa tsjehe xa co ndačo xa:

—Dicon canxion xí satettji co xí yá inchin canxion nttá.

²⁵ Cottimeja vaquehe rá Jesús ngain jmacon xa iná. Co rato mé jehe xa tsjehe xa jian co jmacon xa ndaxingamehe. Co xí mé onchao vicon cain cosa jian.

²⁶ Cottimeja Jesús coetonhe xa para sacjoi xa nchiandoha xa, co ndache xa:

—Ttjia ngagaha rajna co xonhi chojni ndache ixin quehe conha.

*Pedro ndačo que ixin Jesús, mé tti Cristo
(Mt. 16.13-20; Lc. 9.18-21)*

²⁷ Cottimeja Jesús conixin chojni que vacao sacjoi na para ngain rajna que te ngain nont-tehe Cesarea de Filipino. Co are tettji na ngatja nntiha Jesús joanchiangui ngain chojni que vacao co ndačo:

—¿Quehe ndačo chojni ixin quensen na janha?

²⁸ Co jehe na ndačo na:

—Canxion chojni ndačo ixin jaha Juan, tti vancheguitte chojni, co icanxin na ndačo na ixin jaha profeta Elías, co icanxin na ndačo na ixin jaha iná de tti profeta que vacji are saho.

²⁹ Cottimeja joanchiangui Jesús ngain chojni que vacao co ndačo:

—Co jaha ra, ¿quehe ndačo ra ixin quensen na janha?

Cottimeja ndačo Pedro ngain Jesús:

—Soixin tti Cristo. —co Cristo rrocho: tti Dios Coinchiehe.

³⁰ Pero Jesús coetonhe na ixin xonhi chojni rrondache na jihi.

Jesús ndacho ixin jehe ndasenhe

(Mt. 16.21-28; Lc. 9.22-27)

³¹ Cottimeja Jesús coexinhi ndacho ngain chojni que vacao ixin jehe, tti Xí que joixin de ngajni, chonda que anto tangui tsonhe. Co cain xittetonha ngain nihngo co cain xidána que ttetonha ngain icha xidána co cain ximaestroey ley anto rroningaconhe na. Co cain chojni mé nasoexon na jehe pero nchanho ninxin jehe rroxechon.

³² Cain yá nao ndacho Jesús. Cottimeja Pedro joantsjenda Jesús para joinchesattehe Jesús.

³³ Pero Jesús ngaria co tsjehe ngain chojni que vacao, co joinchesattehe Pedro co ndacho Jesús:

—¡Sattjixin de nганji na janha, Satanás! Jaha xaxaonha inchin xaxaon Dios, sino que jaha jehoxaxaon inchin xaxaon chojni.

³⁴ Cottimeja Jesús nichjé chojni que vacao co icha chojni cai co ndacho ngain na:

—Si chonja chojni rinao sacjinha na, pero chonda que rrotjañehe cain tti jehoxehe rinao co sacjinha masqui anto tangui tsonhe co hasta nasenxon.

³⁵ Ixin tti rinao que xonhi tsonhe vidé, mé sinchetján vidé. Pero tti sinchetján vidé de ixin causananxin janha o de ixin causexin tti jian joajna que janha joiquian, mé sechon para cainxin tiempo.

³⁶ Ixin xonhi xé masqui ná chojni sacha cainxin cosa ngataha nontte, si ndasinchetján almé.

³⁷ Ixin ¿quejanhi tsenanxin chojni almé are jehe ndasinchetján?

³⁸ Ixin si čhonja chojni tiempo jai tosoé de nichja jian de ixin janha co de ixin joajnana, cai janha, tti Xí que joixin de ngajni, tsosoahna de ixin chojni mé are sihi conixin ángel co gloria que rrochjana Nnodana que jí ngajni.

9

¹ Cai ndačo Jesús ngain na:

—Ndoa tti rrondattjo ra, que canxion ra xo te ra nttihi senha ra hasta que siconja ra quežén siquetonha Dios nttihi conixin joachaxin que jehe chonda.

*Are vicon na Jesús anto ojé
(Mt. 17.1-13; Lc. 9.28-36)*

² Vatto incjaon nchanho, cottimeja Jesús sajoicao Pedro, Jacobo co Juan ngagaha ná jna anto noi. Co nttiha canio nijoicao Jesús vicon na Jesús anto ojé.

³ Co lonto co conguxima lonto co ndacoroa lonto inchin čhinta ngataha jnanchaha. Co xonhi chojni nttihi ngataha nontte nchao rrocjén lonto co rrojincheroa lonto jamé.

⁴ Co nttiha vicon na Elías co Moisés cjoao Jesús.

⁵ Cottimeja Pedro ndačo ngain Jesús:

—Maestro, anto nchao ixin janha na te na nttihi. Sinttachjian na ní nchiachjan nttihi: ná para ixin soixin, ná para ixin Moisés, co iná nchiachjan para ixin Elías.

⁶ Jañá čo Pedro ixin jehe noeha quehe rronichja ixin jehe co tti yó xicompañeroe anto xaon na are vicon na jamé.

⁷ Cottimeja joí ná ttjoi co ndavittohe na ngacjan ttjoi mé. Co de ngagaha ttjoi mé coinhi na tté Dios que ndačo:

—Jihi tti Xanhna que anto rinaho. Ditticaon ra tti rrondattjo ra Xan.

⁸ Co rato mé ixonhi vicon na masqui tsjehe na ngoixin ngandanji na. Jeho Jesús vicon na tajin-gattjen nttiha, pero Elías co Moisés iviconha na.

⁹ Co are texincanji na de jna mé, Jesús coetonhe canio na ixin xonhi chojni rrondache na tti vicon na, hasta que jehe, tti Xí que joixin de ngajni, rrocjan rroxechon de ngacjén tti nindadiguenhe.

¹⁰ Mexinxin xonhi chojni ndache na tti vicon na. Pero anto vandache chó na jeho na de ixin quehe rročo tti rroxechon de ngacjén tti nindadiguenhe.

¹¹ Cottimeja joanchianguihi na Jesús co ndačo na:

—¿Quedonda ndačo cain ximaestroe ley ixin Elías tti tsí saho que jaha?

¹² Jesús ndačo ngain na:

—Ján ndoa que Elías tti tsí icha saho que janha co jehe siquentoxinhi vidé chojni para que nchao sayehna na janha. ¿Co quehe ndačo ngain tti jitaxin Palabré Dios de ixin janha, tti Xí que joixin de ngajni? Ndačo nttiha ixin chonda que anto tangui tsonna, co ixin tsje chojni tsjanao na ixin sitticaonnaha na.

¹³ Pero janha rrondattjo ra que Elías ojoí. Co chojni joinchehe na feo ngain ixin joinchehe na inchin joinao na ngain jehe inchin jitaxin ngain Palabré Dios.

Jesús joinchexingamehe ná xanxichjan que vechonda espíritu jianha

(Mt. 17.14-21; Lc. 9.37-43)

¹⁴ Co are joí na ngain tti vittohe icha chojni que vacao Jesús, vicon na anto tsje chojni te ngandanji tti nueve chojni que vittohe nttiha. Co cai nttiha te canxion ximaestroe ley co tenchediscutihi xa tti nueve chojni que vittohe nttiha.

¹⁵ Co are vicon cain chojni ixin joiiji Jesús, cain na anto goan na admirado co coinga na cjoí na ngain Jesús para chjé na joajna.

¹⁶ Co Jesús joanchiangui ngain tti nueve chojni co ndačho:

—¿Quehe tetjao ra ximaestroe ley yá?

¹⁷ Co ná de tti chojni que ote nttiha ndačho:

—Maestro, nttihi joiquinha xanhna nganji ixin chonda xan ná espíritu jianha que ndajoinchet-tapo xan.

¹⁸ Cain tti tsexin xan espíritu jihi jehe danca xan ngataha nontte, co hasta ttožo ttixin rroha xan co netaon neno xan. Cain yá tonhe xan co mexinxin xonhi fuerza chonda xan. Ojointtatsán ñao chojni que čjhiho tehe ixin rroguengui na espíritu jihi de ngain xanhna pero coixinha na.

¹⁹ Jesús ndačho:

—¿Quedonda chojni jai čhoha ditticaon? ¿Hasta quesa janha chonda que sarihi nganji ra? ¿Co hasta quesa janha chonda que tsixinna nganji ra? Sicó ra chjan mé nttihi.

²⁰ Cottimeja joiaho na chjan mé ngain Jesús. Pero are espíritu jianha vicon Jesús, joincheguetan xan tanguí co joanca xan ngataha nontte. Co cončindoha xan co joixin ttožo rroha xan.

21 Cottimeja Jesús joanchianguihi ndodé xan co ndačo:

—¿Quejanhi tiempo tonhe xan janhi?

Co ndodé xan ndačo ndo:

—Desde xa nchín xan.

22 Co anto tsje nttiha dancatte espíritu jianha xan xohi co dancangui xan jinda, para rrogoen xan. Si nchao, nttatsaha ñao, ttiaconoana na co nchexingamena xanhna.

23 Co ndačo Jesús:

—Ján, si jaha mismo nchao ditticaon, ixin chojni que ditticaon nchao nchehe cainxin cosa.

24 Cottimeja jehe ndodé xannihi mé ndačo ndo sén:

—Ján, ditticanho nchin; ttjenguijna na para sitticanho icha.

25 Co are vicon Jesús conchienne anto tsje chojni, Jesús joinchesattehe espíritu jianha que vehe ngain chjan mé co ndačo:

—Espíritu jianha, jaha tti rrinchettapo co rrinchecoño chjan jihi, jaxon janha rritetonha que dačhjexin de yá. Ttinttohe chjan jihi co icjanha ngain xan.

26 Co jehe espíritu jianha mé coyao, co joincheguenda xan co joanca xan ngataha nontte iná co vačhjexin de ngain xan. Cottimeja jehe xan ndavenhe xan nchin, hasta tsje chojni que te nttiha ndačo ixin ondavenhe xan.

27 Pero Jesús tsehe rá xan co joinchengattjen xan co jehe xan vingattjen xan.

28 Cottimeja Jesús conixin chojni que vacao joixinhi na ngain ná nchia. Co are jehó jehe conixin chojni que vacao, jehe na joanchiangui na ngain Jesús co ndačo na:

—¿Quedonda janha na čhoha vengui na espíritu jianha yá?

²⁹ Co Jesús ndačho:

—Ixin espíritu inchin mé dengui ni jeho are nchecoanxinhi ni Dios co dinttecjáño ni saho.

Jesús ndačho iná ixin jehe ndasenhe

(Mt. 17.22-23; Lc. 9.43-45)

³⁰ Co are Jesús sacjoixin de nttiha conixin chojni que vacao, vatto na ngain regioen Galilea. Pero Jesús joinao que xonhi chojni conohe ttinó vehe Jesús,

³¹ para jehe vechonda tiempo para vacjagoe chojni que vacao. Co vandačho ngain na ixin chojni sinchechienhe na jehe, tti Xí que joixin de ngajni, para ngain chojni jianha, co icha chojni nasoenxon na jehe. Pero ní nchanho después de ndasenhe, jehe rroxechon.

³² Pero chojni que vacao coinxinha na tti ndačho Jesús ngain na, co xaconcoa na para joanchiangui na ngain Jesús ixin quehe rročho palabra mé.

¿Quensen tti icha importante?

(Mt. 18.1-5; Lc. 9.46-48)

³³ Cottimeja joihi na ngain rajna Capernaum co are ojoixinhi ngain nchia tti vintte na, Jesús joanchianguihi chojni que vacao co ndačho:

—¿Quehe tedanchianguihi chó ra are joihi na ngatja nttiha?

³⁴ Pero jehe na tencoa na ixin are jói na ngatja nttiha, joanchianguihi chó jeho na ixin quensen de jehe na tti icha importante.

³⁵ Cottimeja Jesús tavehe co nichjé tti tteyó chojni que vacao co ndačho ngain na:

—Si čhonja chojni rinao sehe tti icha importante, pero mé chonda que sehe tti icha importantea co tti icha tsjenguijna cainxin icha chojni.

³⁶ Cottimeja Jesús tsehe rá ná chjan co sajoicao xan ngayé na, cottimeja cjóa xan co ndačo ngain na:

³⁷ —Chojni que sayé ná chjan inchin chjan jihi ixin ditticaon na janha, chojni mé jañá sayé na janha, co jeoha janha tti sayé na, cai sayé na tti rroanha na janha.

Chojni que ningacoanha na, chojni mé jí nganji na

(Lc. 9.49-50; Mt. 10.42)

³⁸ Cottimeja ndačo Juan ngain Jesús:

—Maestro, janha na vicon na ná xí que vanchegonda xa joachaxin de nombrea para vaguenguixin xa espíritu jianha, pero janha na ndattjan na xa ixin isincheha xa jañá ixin čhjiha xa nganji na.

³⁹ Co Jesús ndačo:

—Cayacoenha ra chojni mé. Ixin cain chojni que nchehe milagro conixin joachaxin de nombrena, chojni mé čhoha rronichja jianha de ixin janha.

⁴⁰ Ixin chojni que ningacoanha na, chojni mé ján rinao na.

⁴¹ Rrondattjo ra que Dios seguro tsenguehe hna cain chojni que rrochjá jaha ra masqui ná vaso de jinda jeho ixin jaha ra ditticaon ra ixin janha tti Cristo.

Tti sinchenchehe ni cosa jianha

(Mt. 18.6-9; Lc. 17.1-2)

⁴² Co Jesús ndačo cai:

—Quexeho chojni que sincheyehe iná chojni que xa antoha jian ditticaon na janha para sinchehe cosa jianha, icha jian sechianito ná xochin ngain ttosin chojni mé para rroxincanjingui ndachaon.

⁴³ Co si ná rá sinttaxaxaon para sinchehe jianha, ncheha cosa mé masqui hasta tonchinji rá. Ixin icha jian tsji conixin nacoa rá ngain Dios, co naha tsji conixin cayoixin rá ngain infierno tti xonhi tiempo nchao danga xohi.

⁴⁴ Co nttiha xonhi tiempo ditján cotsindo co xonhi tiempo danga xohi.

⁴⁵ Co si ná rottea sinttaxaxaon para sinchehe jianha, ncheha cosa mé, masqui hasta tonchinji rottea. Ixin icha jian tsji conixin nacoa rottea ngain Dios co naha tsji conixin cayoixin rottea ngain infierno tti xonhi tiempo nchao danga xohi.

⁴⁶ Co nttiha xonhi tiempo ditján cotsindo, co xonhi tiempo danga xohi.

⁴⁷ Co si ná jmacon sinttaxaxaon para sinchehe jianha, ncheha cosa mé, masqui hasta dantsjengui jmacon. Ixin icha jian tsji conixin nacoa jmacon ngain Dios co naha tsji conixin cayoixin jmacon ngain infierno,

⁴⁸ tti xonhi tiempo ditján cotsindo co xonhi tiempo danga xohi.

⁴⁹ Chojni chjé na xijntta ngain nntao que danjo na ngain Dios para nchejni na nntao icha. Co jai Dios chjé chojni cain cosa tangui para sicon si sachje na jian o ni nahi. Mexinxin cosa tangui inchin xijntta are saho ixin cosa tangui nchechjoin chojni icha para ixin Dios.

⁵⁰ Xijntta jian, pero si xijntta rrocjan xijntta simple, chojni ičho ha sinchegonda xijntta iná. Mexinxin dintte ra chojni que ocojian, rročo chojni que chonda xijntta. Co dintte ra čhjoin, co doñaoha chó ra, sino que rinao chó ra čhjoin.

10

*Jesús ndačo de ixin xí que dachjendehe čhihi
(Mt. 19.1-12; Lc. 16.18)*

¹ Jesús vačhjexin de ngain rajna Capernaum, co sacjoi para ngain regioen Judea co ngain región que jí toenixin río Jordán. Nttiha cjan xatte chojni ngain Jesús iná, co jehe joinchecoenhe chojni nttiha inchin jehe vanchehe ngain cain lugar.

² Cottimeja conchienne canxion xifariseo ngain Jesús para rrojinchenichja xa Jesús ná cosa nchao ha para que nchao rrocjanguihi xa. Co joanchianguihi xa Jesús ixin anchao ná xí sachjendehe xa čhihi xa.

³ Cottimeja Jesús ndačo ngain xa:

—¿Quehe coetonha ley que vayé Moisés?

⁴ Cottimeja jehe xa ndačo xa:

—Ley ndačo ixin nchao para ná xí sinchekhjian xa ná xón dinhi acta para sachjendexin xa čhihi xa, co ndatsinttohe xa nča.

⁵ Cottimeja ndačo Jesús ngain xa:

—Ley que vayé Moisés coetonha jańá ixin jaha ra atto cha ansean ra.

⁶ Pero are saho Dios joinchekhjian cainxin cosa; co ndačo ngain Palabré Dios janhi: “Dios joinchekhjian chojni xí co nčhí.”

7 “Mexinxin xí dačhjenjehe xa ndodé xa co janné xa para decao xa jehó čihi xa.

8 Co cayoxin chojni mé dintte na inchin nacoaxinxon chojni.” Jańá ijeha yó chojni, jehó nacoa chojni.

9 Mexinxin chojni čhoha santsjenjehe cosa que Dios joinchechjian inchin nacoa.

10 Cottimeja are sacjan na ngain nchia, chojni que vacao Jesús joanchiangui na ngain jehe ixin cosa yá.

11 Co Jesús ndačo ngain na:

—Si ná xí sačhjenjehe xa čihi xa co secoa xa iná nčí, anto jianha sinchehe xí mé ngain čihi xa nčisaho. Ixin rročo que xí mé jicao xa yó nčí.

12 Co si ná nčí sačhjenjehe nča xixihi nča co secoa nča iná xí, cai nčí mé jianha sinchehe nča ngain xixihi nča xisaho. Ixin rročo que nčí mé jicao nča yó xí.

*Jesús joinčenjaon xannchinnchinchjan
(Mt. 19.13-15; Lc. 18.15-17)*

13 Cottimeja joiaho na xannchinnchinchjenhe na ngain Jesús para catte xan conixin rá. Pero chojni que vacao Jesús joinchesattehe na cain chojni que joicao cain chjan mé.

14 Co are Jesús vicon yá, gońao co ndačo:

—Tančhjanda ra xannchinnchinchjan tsí xan nganji; cayacoenra ra xan. Ixin tti ttetonha Dios, nttiha para cain chojni inchin jehe xan.

15 Janha seguro rrondattjo ra que tti chojni que sitticaonha tti ttetonha Dios inchin ná xannchinchjan ditticaon xan tti ttetonhe xan nindoča

xan, chojni mé xonhi tiempo rrochonda parte ngain tti ttetonha Dios.

¹⁶ Cottimeja Jesús cjóa xannchinnchinchjan mé, co vaquehe rá ngataha xan co joinchetsenhe ñao Dios ixin sinchenaon xan.

*Ná xanxí rico cjoao xan Jesús
(Mt. 19.16-30; Lc. 18.18-30)*

¹⁷ Ná nchanho are Jesús sajittji ngatja nttiha, ná xanxí coinga xan joí xan vettoxin nttajochjihi xan ngain Jesús co ndačo xan:

—Maestro, soixin que anto jian, ¿quehe chonda que sinttaha janha para nchao rrochonda iná vida naroaxin que xonhi tiempo tsjexin?

¹⁸ Jesús ndačo:

—¿Quedonda ncheguini na janha jian? xonhi iná tti icha jian, jeho nacoaxinxon, co mé jehe Dios.

¹⁹ Jaha ochonxin tti coetonha Dios inchin: “Ncheyeha čhihi iná tattíta, dantsjeha vidé iná chojni, tteha cosé iná chojni, nichjaha cosa que ndoaha de iná chojni, ncheyeha icha chojni, co ttijho respeto ngain ndodá co ngain janná.”

²⁰ Cottimeja xanxí mé ndačo xan:

—Maestro, cain yá ojointtaha de xa nchín na.

²¹ Are Jesús tsjehe, jehe joinao xanxí mé co ndačo ngain xan:

—Jeho nacoa cosa ditján sinchehe. Ttji co nchecji cainxin tti chonda co nchettonhe chojni noa tomi. Cottimeja nttiha ngajni jaha rrochonda cosa icha rentte. Cottimeja sihi co sacjin na tti janha sacji masqui anto tangui tsonha hasta ndasenhe.

²² Pero are coinhi xan cain yá, anto vechín xan sacjoi xan ixin jehe xan anto rico vehe xan.

²³ Cottimeja Jesús tsjehe ngayé chojni que vacao co ndačo ngain na:

—Atto tangui para ná chojni que chonda anto tsje cosa rrochonda parte ngain tti ttetonha Dios.

²⁴ Co chojni que vacao Jesús goan na admirado de ixin tti nichja Jesús. Pero Jesús cjan ndačo ngain na iná:

—Chojni que chonda confianza que ixin tomi tsjenguijna na, janto tangui para jehe na rrochonda na parte ngain tti ttetonha Dios!

²⁵ Icha tanguiha sattoxinhi ná cocamello ná ttoechjenhe nttachiehe manta que para ná chojni rico rrochonda parte ngain tti ttetonha Dios.

²⁶ Co are coinhi na yá, icha goan na admirado co joanchianguihi chó jecho na co ndačo na:

—¿Mexinxin quensen nchao rrochonda iná vida nroaxin remé?

²⁷ Jesús tsjehe ngain na co ndačo:

—Chojni čhoha sinchehe jamé, pero Dios nchao sinchehe yá, ixin para Dios xonhi cosa tangui.

²⁸ Cottimeja Pedro ndačo ngain Jesús:

—Janha na cointtoa na cainxin tti vechonda na para čhji na nganji soixin.

²⁹ Jesús ndačo:

—Janha seguro rrondattjo ra ixin quexeho chojni que ttinttohe nchiandoha, o xanchó, o ndodé, o janné, o čhihi, o xenhe, o nonttehe de ixin causananxin janha co de ixin causexin joajna que danjo vida nroaxin,

³⁰ chojni mé sayé cien nttiha icha tsje ngain tiempo jihi inchin nchiandoha, co xanchó, co

ndodé, co janné, co xenhe, co nonttehe, masqui tsje chojni rroningaconhe. Co ngain nchanho que tsí sayé vida nroaxin que xonhi tiempo tsjexin.

³¹ Pero tsje chojni que jai xaxaon na ixin anto importante na, are mé, xonhi tsoarentte na. Co tsje chojni que jai xaxaon na ixin jehe na jeha importante na, pero are mé jehe na nisintte icha importante.

*Jesús cjan ndačo iná ixin jehe ndasenhe
(Mt. 20.17-19; Lc. 18.31-34)*

³² Jesús conixin tsje chojni que vacao tettji na ngatja nttiha para Jerusalén; Jesús jitaon nttiha, co chojni que vacao Jesús terroé na. Co jehe na anto tedoan na admirado, co terroé na pero conixin joaxaon. Co Jesús ngaria co vačhjendacaho tti tteyó chojni que vacao de ngayé icha chojni para ndache na quehe tsonhe jehe.

³³ Co ndačo Jesús ngain na:

—Inchin jaha ra tedicon ra, jaxon satettjin na para Jerusalén. Nttiha janha, tti Xí que joixin de ngajni, sinchechienhe na na ngain xidána que ttetonha ngain icha xidána co ngain ximaestroe ley Israel, co nimé ni rrondačo que ixin janha nasenxon na. Co sanjo na na janha ngain xí de ojé nontte,

³⁴ co jehe xa tsjanao na xa janha, co rrožanguihna na cuarta de roa, co tsjatjo na xa nttatté xa co nasoexon na xa. Pero ngain nchanho ninxin janha rroxechon na.

*Tti joanchia Jacobo co Juan
(Mt. 20.20-28)*

³⁵ Cottimeja Jacobo co Juan, cayoi xenhe Zebedeo, conchienne na ngain Jesús co ndačo na:

—Maestro, ná joatotsenhe ñaho na sanchia na nganji.

³⁶ Cottimeja Jesús ndačo:

—¿Quehe rinao ra?

³⁷ Co jehe na ndačo na:

—Nttatsanha ra ñao are soixin sayé joachaxin de tsetonha cainxin cosa, que janha na sintte na nganji, ná na lado jian, co ná na lado cjon.

³⁸ Cottimeja Jesús ndačo ngain na:

—Jaha ra noaha ra tti danchia ra. ¿Anchao tsonha ra tti anto tangui que janha tsonna, co anchao ndasenhe ra inchin janha ndasenhe na?

³⁹ Co jehe na ndačo na:

—Ján, nchao.

Co Jesús ndačo ngain na:

—Ján, ndoa, anto tangui tsonha ra, co senhe ra inchin janha senhe na.

⁴⁰ Pero jeha janha tti danjo joachaxin ixin quensen sehe lado jian na co quensen sehe lado cjon na. Jeho Ndodana tti danjo joachaxin mé ngain quexeho chojni que jehe ochonxin.

⁴¹ Are coinhi tti itte chojni que vacao Jesús ixin quehe joanchia Jacobo co Juan, anto goñao na nganji cayoi.

⁴² Pero Jesús nichjé na co ndačo ngain na:

—Jaha ra noha ra que cain xí que ttetonha ngain nación, ttetonha xa inchin rinao xa, co cain icha xí que chonda joachaxin nttiha anto ttetonha xa ngain chojni.

⁴³ Pero jeha jamé tsonhe ngayaha ra, sino que tti rinao icha tsetonha ngayaha ra, pero mé chonda que icha tsjenguijna icha chojni.

⁴⁴ Co quexeho de jaha ra xo rinao ra sintte ra icha importante, pero jehe mé cai chonda que sehe inchin esclavo para ngain icha chojni.

⁴⁵ Ixin janha, tti Xí que joixin de ngajni, joiha para que chojni sinchehe xana, sino que janha joihi para joicjenguijna chojni co para sanjo vida para tsjenga hna tti teca tsje chojni.

Jesús joinchexingamehe Bartimeo, tti vaguiconha

(Mt. 20.29-34; Lc. 18.35-43)

⁴⁶ Cottimeja Jesús conixin chojni que vacao joihi na ngain ciudad de Jericó. Co are Jesús conixin chojni que vacao co anto tsje icha chojni vačhjegaxin na de ciudad mé, vicon na ngandehé nttiha tají ná xí vaganchiagaha ixin vaguiconha. Co tattíta mé vinhi Bartimeo, xenhe ná tti vinhi Timeo.

⁴⁷ Co are conohe que ochian jidiji Jesús que joixin Nazaret, jehe tti vaguiconha mé coexinhi ndačo sén:

—¡Jesús, tti razé David, ttiacnoana na janha!

⁴⁸ Anto tsje chojni joinchesattehe na ixin rroten-coa, pero jehe ndačo icha sén:

—¡Soixin, razé David, ttiacnoana na janha!

⁴⁹ Cottimeja Jesús tavengattjen co ndačo:

—Dayehe ra xí yá.

Cottimeja jehe na vayé na xa co ndačo na:

—Taha joachjaon co dingattjen ixin Jesús jidayaha jaha.

⁵⁰ Cottimeja jehe tti vaguiconha mé nttihao vanca tti jitsá co vingattjen daca co conchienne ngain Jesús.

⁵¹ Cottimeja ndačo Jesús ngain:

—¿Quehe rinao sinttaha nganji?

Jehe tti vaguiconha ndačo:

—Maestro, janha rinaho sicon.

⁵² Co Jesús ndačo:

—Oxingamehe con ixin vitticaon nganji janha. Co onchao sattji nchiandoi.

Co rato mé jehe tti vaguiconha mé onchao vicon co rroé Jesús tti sacjoi Jesús.

11

Jesús joigaha ciudad de Jerusalén

(Mt. 21.1-11; Lc. 19.28-40; Jn. 12.12-19)

¹ Después joiiji na ngandehe rajna Betfagé co rajna Betania que te chian Jerusalén co nttiha tavintte na rotté jnanchjan dinhi Nttaolivo. Nttiha Jesús coetonhe yó chojni que vacao jehe

² co ndačo ngain na:

—Ttji ra ngain rajnanchjan taha. Yá sinchí ra ná colochó jíchó co xa xonhi chojni diguetaha va. Tonxindanguehe ra va co sicó ra va.

³ Co si chonja chojni sanchianguiha ra ixin quedonda jañá tenchehe ra, ndache ra na ixin ximaestroa ra rrongondehe xa va; cottimeja sicán ra va.

⁴ Cottimeja sacjoi cayoi chojni mé co vittja na colochó tajiçhoa va ngain ná puerté nchia ngaxin nttiha, co conxindanguehe na va.

⁵ Co icanxin chojni que te nttiha ndačo na:

—¿Quehe tenchehe ra yá? ¿Quedonda tonxindanguhe ra colochó yá?

⁶ Co cayoi na ndačo na inchin ondačo Jesús ngain na. Co chojni que te nttiha coančhanda na na sacjoi na conixin colochó.

⁷ Cottimeja joicao na colochó mé ngain Jesús co cjoanjihí na va tti tetsá na co Jesús vetaha va.

⁸ Co anto tsje chojni coingo na ngá nttiha tti tetsá na co icanxin na coingo na ramanchjenhe nttá para conchjian chaho tti coingachje colochóhe Jesús.

⁹ Co chojni que vitaonhe Jesús nttiha co chojni que rroé Jesús, cainxin na ndačo na sén:

—¡Gloria ngain Dios! Co anto jian tti joí conixin nombré Dios.

¹⁰ ¡Co anto jian tti siquetonha inchin coetonha David ndogelitoa na xančhjen! ¡Gloria ngain Dios!

¹¹ Jañá joigaha Jesús ngain ciudad de Jerusalén co joixinhi nihngo icha importante nttiha. Co are joixin tsjehe Jesús cainxin cosa nttiha, sacjan Jesús para ngain rajna dinhi Betania conixin tti tteyó chojni que vacao, ixin ondacotsocjin.

Jesús nichja ngain nttahigo que xonhi ttochjoin jiyá

(Mt. 21.18-19)

¹² Nchanho yoxin are vačhjexin na de Betania, Jesús venhe jintta.

¹³ Co de cjín viconxin Jesús ná nttahigo que jiyá nttá ca co Jesús joitsjehe nttá ixin ayá nttá ttohigo. Pero vittjaha Jesús ní ná tto ixin xa jeha tiempoe tto.

¹⁴ Cottimeja Jesús ndačo ngain nttahigo mé:

—Āonhi chojni rrocjan sine ttochjoian iná.
Co coinhi cain chojni que vacao Jesús.

Jesús joincheroa nihngo icha importante
(Mt. 21.12-17; Lc. 19.45-48; Jn. 2.13-22)

¹⁵ Cottimeja jói na Jerusalén iná. Co are Jesús joixinhi patioe nihngo icha importante, coexinhi joantsjexin de nttiha cain chojni que tenchecji co tettehna cosa nttiha. Jesús concjamangui mesé cain tti tedasinguixinhi icha chojni tomi para rrochondaxin na suelto, co concjamangui nttaxitaoen cain tti tenchecji conttoanjani.

¹⁶ Co iĀonhi chojni coanĉjanda Jesús para coattoa na patioe nihngo mé conixin cosé na.

¹⁷ Co Jesús joinchecoenhe na co ndaĉho ngain cain na:

—Jítaxin ngain Palabré Dios: “Nchiania sehe nchia para sinchecoanxinna na janha chojni de ngoixin mundo.” Pero jaha ra ndadinchechjian ra nchia ná lugar tti ĵatte tti chehe.

¹⁸ Co cain xidána que ttetonha ngain icha xidána co cain ximaestroey ley coinhi xa quehe ndaĉho Jesús, co joincheĵoxinha xa. Mexinxin coexinhi xa cjoé xa queĵén sinchehe xa para nasoenxon xa Jesús. Pero vaĵaon xa ixin cainxin chojni tiempo mé joincheĵoxinhi na cainxin tti cjoago Jesús.

¹⁹ Co are ondaconaxin xehe, Jesús sacjoixin de ngain ciudad mé.

Nttahigo que ndadixema
(Mt. 21.20-22)

²⁰ Co ndoexin dacao vatto na tti jí nttahigo que Jesús nichjé. Co vicon na ondadixema ngoixin nta.

²¹ Cottimeja Pedro ŋaxaon quehe ndaĉho Jesus co ndache Jesus:

—Maestro, tsjexin, nttahigo que nichjehe, ondadixema ntta.

²² Co Jesus ndaĉho:

—Ditticaon ra seguro ngain Dios.

²³ Co seguro rrondattjo ra ixin quexeho chojni que rrondache jna jime: “Sattjixin de ya, co digaritsiahngui ndachaon”, co si chojni me seguro ditticaon que Dios sinchehe jame, seguro que jame tsonhe.

²⁴ Mexinxin ndattjo ra que are sanchia ra na cosa ngain Dios, ditticaon ra seguro que ovayehe ra co seguro jame tsonhe.

²⁵ Co are tenchecoanxinhi ra Dios, si ĉhonja chojni tonaohe ra, nchetjanehe ra. Jame cai Ndoa ra que ji ngajni sinttatjanaha ra Ndo cain cosa jianha que nchehe ra.

²⁶ Pero si jaha ra sinchetjaneha ra chojni me, cai Ndoa ra que ji ngajni ĉhoaha sinttatjanaha ra Ndo cain cosa jianha que nchehe ra.

*Tti joachaxin que chonda Jesus
(Mt. 21.23-27; Lc. 20.1-8)*

²⁷ Cottimeja joiji na Jerusalen. Co cjo i na ngain nihngo icha importante. Co are Jesus tarridehe nttiha ngain nihngo, conchiennehe ngain Jesus canxion xidana que vaquetonha ngain icha xidana co canxion ximaestro e ley co icanxin xi que ttetonha ngain nihngo.

²⁸ Co ndaĉho xa ngain Jesus:

—Quehe joachaxin chonda jaha para nchehe cain cosa jihi? Quensen chja joachaxin jihi?

29 Co Jesús ndaĉho:

—Cai janha sanchianguiha ra ná cosa, co si rrondachjenji ni ra tti janha sanchianguiha ra, cai janha rronhattjo ra quehe joachaxin nttaxin janha cain cosa jihi.

30 Ndachjenji ni ra: ¿Quensen rroanha Juan para joincheguitte chojni? ¿A Dios o ani chojni?

31 Cottimeja coexinhi xa joanchianguihi chó jeha xa co ndache chó xa:

—¿Quehe rrondaĉho na? Si rrondaĉho na ixin Dios rroanha, jehe rronhattjo na: “¿Quedonda vit-ticaonha ra tti ndaĉho Juan remé?”

32 ¿O apoco rrondaĉho na ixin chojni rroanha?

Ixin vaĉagoen na chojni ixin cainxin chojni vit-ticaon ixin Juan vanichja joajna que vagayé de ngain Dios.

33 Mexinxin ndaĉho na ngain Jesús:

—Nonaha na.

Cottimeja ndaĉho Jesús ngain na:

—Mexinxin janha cai rronhattjoha ra quexehe joachaxin nttaxin cain cosa jihi.

12

Ejemplo ninchehe xa jianha

(Mt. 21.33-46; Lc. 20.9-19)

1 Cottimeja Jesús coexinhi ndache na ixin ejemplo co ndaĉho:

—Vehe ná xí que cjoenga xa ná jngui de nttauva co joinchekhjian xa cerco ngoixin ngandehe jngui mé, co joinchekhjian xa ná lugar tti vaguinxin na ttouva, co joinchekhjian xa ná torre para vaguiconxin xa ngoixin ngataon jnguihi xa.

¹Co después joanjo xa nttattochjoin media ngain canxion tti nchehe ꝥa co jehe xa sacjoi xa cjin.

²Co are ojoí tiempoe cosecha, jehe xa rroanha xa ná ninchehe ꝥé xa para joiganchia tti parte de cosecha que jiquininxin sayé tti xinajni mé.

³Pero tti nicoá nttattochjoin media tse na tti nchehe ꝥé xinajni mé, goen na co vengui na co ꝥonhi chjé na.

⁴Cottimeja xinajni mé rroanha xa iná tti nchehe ꝥé xa, pero cai mé coaxin na ꝥo, conꝥhintaonhe na já co nichja na feo ngain.

⁵Cottimeja rroanha xinajni mé iná tti nchehe ꝥé xa, pero mé nagoenxon na. Cottimeja xinajni mé rroanha xa tsje tti nchehe ꝥé xa, pero canxion na vicaon na co icanxin na nagoenxon na na.

⁶Co jeho nacoa xenhe xa vechonda xa co anto vajinao xa xan co jeho xan mé vittohe ngain xa. Co rroanha xa xenhe xa mé cai ixin ꝥaxaon xa: “Chonda na que sicao na respeto ngain xanhna.”

⁷Pero jehe tti nicoá nttattochjoin media cjoao na co ndaꝥho na: “Jihi tti sayé ngoixin jngui jihi de herencia. Nadoenxon na co ján na ndasittoá na cain.”

⁸Mexinxin tse na xan, co nagoenxon na xan co joantsjegaxin na cuerpoe xan de ngain jngui de nttauva.

⁹Cottimeja Jesús ndaꝥho:

—¿Quehe sinchehe xinajni mé? Tsí xa co nagoenxon xa jehe tti nicoá nttattochjoin media, co sanjo xa jnguihi xa ngain ojé chojni.

¹⁰¿Ꝥa chonxinha ra tti ndaꝥho ngain tti jitaxin Palabré Dios? Nttiha ndaꝥho:

Tti ꝥo que joinchegondaha xittette nchia,

pero xo mé tti xo joiguehe icha importante.

¹¹ Co jihi joinchehe Dios, co para ixin ján na cosa jihi anto chjoin.

¹² Cottimeja cain na joinao na rrotse na Jesús co rroquiaxinhi na, ixin jehe na nohe na que ejemplo jihi jinichja de ixin jehe na. Pero ixin vařagoen na cain chojni, mexinxin nttiha cointtohe na Jesús, co jehe na sacjoi na.

Tti roxenga hna ngain impuesto

(Mt. 22.15-22; Lc. 20.20-26)

¹³ Cottimeja rroanha na ngain Jesús canxion xifariseo co icanxin chojni que vacao Herodes, para rrojinchenichja na Jesús cosa ndoaha para nchao rrocjanguihi na Jesús.

¹⁴ Co chojni mé joí na ngain Jesús co ndařho na:
—Maestro, janha na nona na que soixin nichja tti ndoa co ncheha caso tti ndařho icha chojni, ixin soixin ncheha juzgado chojni rico ojé que chojni noa, sino que nchecoenhe jian cain chojni de ixin nttié Dios. Mexinxin ndachjenji ni ra: ¿Anchao jí tsjengá na hna impuesto ngain xiemperador o ni nahi? ¿Atsjengá na xa hna o ni tsjengaha na xa hna?

¹⁵ Pero Jesús oconohe de tti jianha que jehe xa teřaxaon xa, co Jesús ndařho ngain xa:

—¿Quedonda jaha ra rinao ra sincheyana ra? Sicohna ra ná tomi para janha sicon.

¹⁶ Co jehe na joicaohe na Jesús ná tomi co are vicon Jesús tomi mé, ndařho ngain na:

—¿Quensen con jinganito tomi jihi co quensen nombré jitaxin nganito nttihi?

Co jehe na ndařho na:

—Con xiemperador co nombré xa.

¹⁷ Cottimeja ndačo Jesús ngain na:

—Chjehe ra xiemperador tti jiquininxin xa co danjo ra ngain Dios tti jiquininxin sayé jehe.

Co goan na admirado ixin jañá čo Jesús.

Canxion chojni joanchiangui quexén rroxechon ni

(Mt. 22.23-33; Lc. 20.27-40)

¹⁸ Cottimeja cjoí canxion xisaduceo ngain Jesús. Xí mé vaguitticaon xa ixin cain tti ndadenhe irroxechonha. Co ndačo xa ngain Jesús:

¹⁹ —Maestro, Moisés diquintoena na ná ley que ndačo: si ná xí ndasenhe co tsinttohe xa čihi xa, co xonhi chjan tsinttohe xa, mexinxin chonda que ná xanchó xa xanxí secoo nchiganha mé para rrochonda na chjan para que xan mé sintte xan xá rrocji xenhe tti ndavenhe.

²⁰ Nchao remé; vintte yáto xanxí chó xan. Xansaho vecao xan čihi xan, pero ndavenhe xan co xonhi chjan cointtohe xan.

²¹ Co xanyoxin vecao xan jehe nchiganha mé, pero cai ndavenhe xan co xonhi chjan cointtohe xan. Co xajeho conhe conixin xanninxin.

²² Co jamé tti yáto xanxí mé vinttecao xan jecho nchiganha mé, co ni ná xan cointtoeha xan chjan hasta ndavenhe cain xan. Cottimeja ndavenhe nchiganha mé cai.

²³ Mexinxin are rroxechon na, co rrocjan sinttechon xan, ¿quexehe de tti yáto xan mé sehe mero xixihi jehe nchí mé, ixin cain xan vinttecao xan nchí mé?

²⁴ Cottimeja Jesús ndačo:

—Jaha ra nchaoha jí tti tenichja ra ixin chonxinha ra tti jitaxin ngain Palabré Dios co chonxinha ra joachaxin que chonda Dios.

²⁵ Are rroxechon cain chojni que ondavenhe, nttiha ni tsotteha na, ni sanjoha na xenhe na para tsottehe xan ixin sintte na inchin ángel que te noi.

²⁶ Pero de tti jaha ra danchianguina ra de ixin tti chojni que ndadenhe, ¿atsjeha jaha ra libroe Moisés de ixin queʒén Dios nichjé Moisés de ngagaha tti canchaha que jiche? Nttiha ndačo janhi: “Janha tti Dios de Abraham co Isaac co Jacob.”

²⁷ Mexinxin Dios jeha Dios de nindadiguenhe, sino que Dios de chojni que techon, co para ixin Dios cainxin chojni techon na. Mexinxin jaha ra nchaoha jí tti tenichja ra.

*Tti icha importante que ttetonha Dios
(Mt. 22.34-40)*

²⁸ Cottimeja ná ximaestroe ley que coinhi xa are Jesús cjoao xisaduceo ximaestro mé conchienne ngain Jesús. Co ixin joatsoan xa que ixin Jesús nchao ndajoinchetencoa xisaduceo, mexinxin joanchianguihi xa Jesús co ndačo xa:

—¿Quexehe tti icha importante que ttetonha Dios sinchehe ni?

²⁹ Co Jesús ndačo:

—Tti icha importante de cainxin ndačo janhi: “Ttinhí ra jian jaha ra chojni Israel, nacoaxinxon Dios jí co jehó mé tti chonda cain joachaxin co jehó mé tti Dios de ján na.

³⁰ Rinao ra Dios mé conixin ansean ra, conixin almá ra, conixin joarrixaoan ra co cainxin fuerza

que jaha ra chonda ra.” Jihi tti mandamiento icha importante para sinchehe chojni.

³¹ Co iná mandamiento chian xajeho ixin ndačo: “Rinao ra cainxin chojni inchin rinao ra cuerpoa ra.” Co xonhi icha mandamiento icha importante para sinchehe chojni, jeha cayoi mandamiento yá.

³² Co ximaestroe ley ndačo xa:

—Ján, nchao tti ndačo, Maestro, ixin ján, ndoa tti ndačo. Jí jeha nacoaxinxon Dios co xonhi iná dios jí, jeha jehe.

³³ Co para ná chojni rinao Dios conixin ansén, conixin cain joarrixaoen, conixin almé, co cainxin fuerza que chonda, co para rinao cainxin chojni inchin jehe rinao cuerpoe; cain cosa jihi icha jian ndoa, que cain coxigo que tjaga ni ngataha xohi para ixin Dios, co icha jian que coxigo que doen ni para danjo ni ngain Dios.

³⁴ Are Jesús coinhi ixin cain tti ndačo xí mé nchao jí, jehe ndačo ngain xa:

—Jaha ochian rrihi para rrochonda parte ngain tti ttetonha Dios.

Cottimeja cain chojni ndaxaon na para joanchi-anguihi na Jesús icha cosa.

Tti dindačo David de ixin Jesucristo

(Mt. 22.41-46; Lc. 20.41-44)

³⁵ Ná nchanho are Jesús tajinchecoenhe chojni ngain nihngo icha importante, jehe ndačo:

—¿Quedonda ndačo ximaestroe ley ixin Cristo ná xanntí David?

³⁶ Ixin Espíritu Santo joinchenichja David co ndačo:

Tti Ttetonha cainxin cosa ndačo ngain tti Ttetonha janha:

“Darihi ngaca lado jian na hasta janha sinttagacha jaha ngain cain tti ningaconha.”

³⁷ Pero ¿queñén que Cristo jehe ná xantí David, si David mismo ndačo ixin Cristo tti Ttetonha ngain jehe?

Co tti tsje chojni que te nttiha anto ché na coinhi na cain tti nichja Jesús.

*Jesús joinchesattehe ximaestro ley
(Mt. 23.1-36; Lc. 11.37-54; 20.45-47)*

³⁸ Co Jesús ndačo are jinchecoenhe na:

—Ttjiho ra cuidado de ncheha ra inchin nchehe ximaestro ley ixin jehe xa ncheřoxinhi xa ċhi xa conixin lontto icha jinjini, co rinao xa que chojni sanjo na joajna ngain xa conixin anto tsje respeto are ngain nttiha,

³⁹ co are ngaxinhi nihngo, jehe xa ttjé xa tti xintaon icha importante para dinttetaha xa, co are ttji xa dijine xa, jehe xa rinao xa tti icha jian lugar ngain mesa.

⁴⁰ Cai jehe xa dantsjehe xa nċhiganha nchian-doha nċha ixin ittixinha nċha ttjenga nċha hna contribución. Co para řonhi chojni rrořaxaon ixin jehe xa jianha nchehe xa, jehe xa nchecoanxinhi xa Dios anto sé. Mexinxin cain ximaestro mé sayé xa anto soji castigo.

*Tomi que joanjo ná nċhiganha noa
(Lc. 21.1-4)*

⁴¹ Ná nchanho Jesús tají ngaxinhi nihngo icha importante chian ngaca cain cajé alcancia. Tajit-sjehe Jesús are chojni tettinttohe na tomi nttiha. Co tsje chojni rico cointtohe na anto tsje tomi.

⁴² Co are mé joí ná nchiganha co noa ncha, co cointtohe ncha ngain ná caja mé yó centavochjan que anto rentteha.

⁴³ Cottimeja Jesús vayé chojni que vacao co ndačo ngain na:

—Janha ndoa tti rroundattjo ra, que nchiganha noa jiji joanjo ncha icha tsje que cain chojni que tettenga tomi cain caja.

⁴⁴ Ixin cain chojni danjo na jecho tti xehe na. Pero nchí noa jiji vanjo ncha cain tomi que jehe ncha jichonda ncha.

13

Jesús ndačo ixin rroxantte nihngo icha importante

(Mt. 24.1-2; Lc. 21.5-6)

¹ Co are Jesús vačhjexin de nihngo icha importante, ná de tti chojni que vacao ndačo ngain jehe:

—¡Maestro, tsjexin anto yeye xó tehe co anto yeye nchia co anto čhjoin diconchjian nchia!

² Co Jesús ndačo:

—¿Adicon cain nchia yeye yá? Pero yá sittoeha ni ná xó ngataha iná xó; cainxin rroxantte.

Quehe tsonhe icha saho que mundo ndatsjexin

(Mt. 24.3-28; Lc. 21.7-24; 17.22-24)

³ Cottimeja savinttecji na ngain jnanchjan que dinhi Nttaolivo, que jí chian de nihngo mé. Co are

Jesús tají nttiha, Pedro, Jacobo, Juan, co Andrés ndačo na ngain Jesús:

⁴ —Rinaho na que rrondachjenji ni ra quesá tsonhe cain cosa yá. ¿Quehe señal sehe are cain cosa yá siconhe?

⁵ Cottimeja Jesús ndačo:

—Ttjiho ra cuidado que xonhi chojni sinttayaha ra.

⁶ Ixin anto tsje chojni tsí co sinchegonda na nombrena co rrondačo na: “Janha tti Cristo na”; co sincheyehe na tsje chojni.

⁷ 'Co are jaha ra tsinhi ra ixin jí guerra chian co cjin, jaha ra xonha ra ixin jamé chonda que tsonhe. Pero xa jeha tiempo para ndatsjexin mundo.

⁸ Ixin ná nación tsetocaho iná nación. Co ná region tsetocaho iná región. Co tsingui nontte tsje lugar, co tsje chojni senxin jintta co chojni tsetocaho chó na. Are cain cosa jihi tsonhe nandá tsexinhi tsonhe tti anto tangui que tsonhe chojni.

⁹ 'Pero jaha ra ttjiho ra cuidado ixin rrotse ra na co sinttachianha ra na ngain xittetonha icha. Co soen ra na ngaxinhi nihngo. Co chonda que jaha ra tsonchienne ra ngain tsje xigobernador co tsje xirey de ixin causananxin janha. Cain jihi rrochondaxin ra oportunidad de rronichja ra ngain cain jeha xa de ixin janha.

¹⁰ Ixin icha saho que mundo ndatsjexin chonda que tsonohe chojni de cainxin nación ngoixin mundo tti joajna que danjo iná vida naroaxin.

¹¹ Co are rrotse ra na co sinttachianha ra na ngain xittetonha icha, taha ra joachjaon de ixin quehe rrondačo ra ngain xa, co ni xaxaonha ra

de ixin mé. Jeho rrondaçho ra tti Dios rronhattjo ra rato mé ixin jeha jaha ra tti rronichja ra, sino que Espíritu Santo tti sinttanichja ra.

¹² Co tsje chojni sinchechienhe xanchó na ngá rá niningaconhe xan co rrondaçho na para nasenxon xan. Co te nindoha chjan que sinchechienhe xenhe na ngá rá niningaconhe xan, co te chjan que sinchechienhe nindoha xan ngá rá niningaconhe na para que jehe na nasoenxon na na.

¹³ Co cainxin chojni rroningaconha ra de ixin causananxin na janha. Pero chojni que cainxin tiempo sitticaon jian nganji na janha, chojni mé rrochonda iná vida naroaxin.

¹⁴ 'Co profeta Daniel dicjin co ndaçho de ixin ná cosa icha jianha de cainxin cosa co anto nchejianha icha cosa. Co are sicon ra cosa jianha mé ngain nihngo icha importante tti jiquininxinha sehe jehe mé —tti tsjehe xón jihi, chonda que tsinxin—, are mé chojni que te Judea chonda que satsinga na para ngagaha jna.

¹⁵ Co chojni que sintte ngataha techoe nchian-doha, are jehe sania, que sixinha ngaxinhi nchiandoha para sirroé cosé que jí ngaxinhi nchia co jaca satsinga.

¹⁶ Co chojni que sintte ngataon jngui, que rrocjanha ni para sirroé lonttoe ngain nchiandoha, sino que jaca satsinga.

¹⁷ ¡Anto tangui para ixin nchí que sintteyá chjan nchanho mé o nchí que rrochonda chjan que xá tetai!

¹⁸ Nchetsenhe ra ñao Dios que jaha ra rrochondaha ra que satsinga ra mero ngain tiempoe quin

¹⁹ ixin ngain nchanho mé icha tangui tsonhe chojni, que xa xonhi tiempo tonhe jamé ni desde que Dios joinchechjian mundo, ni tsonhe después.

²⁰ Co si Dios sinchenchinha tiempo mé, xonhi chojni rroxehé. Pero Dios sinchenchín tiempo mé ixin jehe rinao chojni que coinchiehe.

²¹ 'Co si chonja chojni rrondattjo ra: "Tsjexin ra nntihi jí Cristo", o "Tsjexin ra nojiha jí", pero jaha ra ditticaonha ra.

²² Ixin tsí anto tsje tti sincheyehe chojni ixin rrondačo na que jehe tti Cristo co rrondačo na ixin jehe na dayé na joajna de ngain Dios. Co sinchehe na tsje señal co milagro para sincheyehe na tsje chojni, co si nchao hasta tti chojni que Dios mismo coinchiehe, sincheyehe na.

²³ Pero jaha ra xaxaon ra que ixin janha ondattjo ra jai cain de ixin nchanho mé.

*Quexén tsí tti Xí que joixin de ngajni
(Mt. 24.29-35, 42-44; Lc. 21.25-36)*

²⁴ Co Jesús ndačo cai:

—Pero después de tiempo tangui mé, nchanho isinchegasanha, co conittjao isanjoha va chíxo.

²⁵ Conotse sinttjixin va de ngajni, co hasta cain cosa que jí ngajni rroxanga.

²⁶ Cottimeja sicon na na janha, tti Xí que joixin de ngajni, sihi ngacjan ttjoi conixin anto tsje joachaxin co gloria.

²⁷ Cottimeja rrorroanha cain angelna para tsji sicjejo cain chojni que janha coinchiá de cainxin parte de ngoixin mundo co de ngajni.

28 'Tangui ra ejemploe nttahigo: Are xesan ramé ntta co čhinhi qué ntta, jaha ra onoha ra ixin ochian tsí tiempoe čhin.

29 Co řajeho jamé cai, are jaha ra sicon ra tsonhe cain cosa yá, jaha ra noha ra ixin ochian sihi janha iná, ongandanguí puerta sihi.

30 Co seguro rrondattjo ra que cainxin cosa yá tsonhe icha saho que cain chojni de generaci3n jiji ndasenhe.

31 Ngajni co nontte ndasitj3n, pero palabrana sitjanha; chonda que tsonhe cain tti janha ndačhjan.

32 'Pero nchanho co hora que tsonhe mé ni ná chojni noeha, ni cain ángel que te noi noeha, ni janha, tti Xenhe Dios, nonaha. Jeho Dios Ndodá na tti nohe.

33 'Mexinxin jaha ra dintte ra listo co nchecoanxinhi ra Dios, ixin noaha ra quesá tsí hora mé.

34 Jamé inchin ná xí que satsji cjin co tsinttohe xa nchiandoha xa. Pero icha saho que satsji xa, ttetonhe řa cain ninchehe řé xa ixin sinttenda na jehe nchia mé. Co ndache xa cada na quehe řa sinchehe na, co ttetonha xa ngain xiportero ixin senda xa jian.

35 Mexinxin jaha ra dintte ra listo ixin jaha ra inchin tti nivittoenda nchia mé. Venoeha na quesá rrocjan xinajní na; ¿atsí xa are tsocjin, o atsí xa are ttie, o tsí xa are ndoyo, o atsí xa are osingasán?

36 Co nchaoha si are sihi janha, jaha ra sintteha ra listo.

37 Tti ndattjo ra jeoha para ixin jaha ra, ndačhjan para ixin cainxin chojni: ¡Dintte ra listo!

14

Are vinttecjao na quexén sinchehe na para rrotse na Jesús

(Mt. 26.1-5; Lc. 22.1-2; Jn. 11.45-53)

¹ Vitján yó nchanho para tti quiai dinhi pascua are jine na niottja que chondaha levadura. Co are mé cain xidána que vaquetonha ngain icha xidána co cain ximaestroe ley cjoé xa quexén sinchehe xa para rrojincheyehe xa Jesús co rrotse xa co nasoenxon xa.

² Pero ndačo xa:

—Sonttoha na are mero quiai ixin cain chojni seguro tsoñaoa na na co tsetocoho na na.

Nčí que cointtjitte aceite cuerpoe Jesús

(Mt. 26.6-13; Jn. 12.1-8)

³ Ná nchanho ngain rajna Betania Jesús tajine ngaxinhi nchiandoha Simón tti veninxin chin lepra. Co are jehe tají ngain mesa, joixinhi ná nčí que joicao ná xočo de marmol jíche de aceite que anto xajni que diconchjian joxon ca dinhi nardo co aceite mé anto rentte. Condai ncha xo mé co cointtjitaha ncha cain aceite mé ngataha já Jesús.

⁴ Co canxion de tti nite nttiha goña na na ndache chó na jecho na:

—¿Quedonda coxinoa aceite yá?

⁵ Nchao rrocchji aceite yá co anto tsje tomi rroguitte, inchin tsjexin dacha ná tti nchehe xa ngoixin ná nano. Co tomi mé nchao rrocjenguijna chojni noa.

Co joinchesattehe na tti nčí mé.

⁶ Pero Jesús ndačo ngain na:

—Tančhjanda ra nchí yá. ¿Quedonda nchesattehe ra? Jehe ncha joinchehe ncha ná cosa jian nganji na janha.

⁷ Chojni noa cainxin tiempo sintte na ngayaha ra, co nchao tsjenguijna ra na are jaha ra sinoa ra. Pero janha cainxinha tiempo sarihi nganji ra.

⁸ Nchí jihi joinchehe ncha tti nchao conohe ncha joinchehe ncha. Ochjé ncha cuerpona aceite para rrořavá na.

⁹ Co seguro rrondattjo ra que ngoixin mundo tti rronichja na tti joajna que danjo iná vida naroaxin, cai rronichja na ixin quehe joinchehe nchí jihi nganji na janha, para rrořaxaon na de ixin jehe ncha.

Judas ndačo para rrotse na Jesús

(Mt. 26.14-16; Lc. 22.3-6)

¹⁰ Cottimeja Judas Iscariote, jehe ná de tti tteyó chojni que vacao Jesús, cjoí ngain canxion xidána que vaquetonha ngain icha xidána, para cjoao chó na queřen jehe Judas sanjo Jesús ngain xa.

¹¹ Co are jehe xa coinhi xa ixin quehe joindačo ngain xa anto ché xa, co ndačo xa ngain ixin sanjo xa tomi. Cottimeja Judas coexinhi řaxaon ixin queřen sinchehe para sinchechienhe Jesús ngain xa.

Are joinecaho Jesús tti tteyó chojni que vacao

(Mt. 26.17-29; Lc. 22.7-23; Jn. 13.21-30; 1 Co. 11.23-26)

¹² Ngain saho nchaoen quiai que jine na niottja que chondaha levadura, nchanho mé doen na coleco. Co chojni que vacao Jesús joanchianguihi na co ndačo na ngain:

—¿Ttinó rinao sinttachjianxin na tti sintte soixin ngain quiai pascua?

¹³ Cottimeja Jesús coetonhe yó chojni que vacao co ndačo ngain na:

—Ttji ra ngain ciudad de Jerusalén, co nttiha setan ra ná xí que jidicao ná nchíxa de jinda. Sattjiho ra xí mé.

¹⁴ Co tti nchia sixinhi xa, nttiha ndache ra tti ndoha mé: “Tti Maestro ndačo: ¿Ttinó jí cuarto tti sinexin ngain quiai pascua conixin cain chojni que dicao?” Jañá čoache ra tti ndoha mé.

¹⁵ Cottimeja jehe tti ndoha mé tsjagoha ra ná cuarto jie ngain piso yoxin que onchao jí. Nttiha nchechjianxin ra tti sontte na.

¹⁶ Cottimeja cayoi chojni mé sacjoi na para ngain ciudad co vittja na cain inchin Jesús ndačo ngain na. Co nttiha joinchechjianxin na tti joine na ngain quiai pascua.

¹⁷ Co are ondacontie Jesús co tti tteyó chojni que vacao xatte na para joinecaho na.

¹⁸ Co are tene na, Jesús ndačo ngain na:

—Janha seguro rroundattjo ra que ná de jaha ra xó tentte ra nganji na jaxon rroundache ra chojni quexén para rrotse na na janha.

¹⁹ Cottimeja cain jehe na tavinttechín na co coexinhi na joanchianguihi na Jesús ná na co ná na, co ndačo na:

—¿Apoco janha?

Co cai iná ndačo:

—¿Apoco janha?

²⁰ Co Jesús ndačo:

—Ná de tti tteyó jaha ra que tejintte ra ngain láto jiji conixin janha.

²¹ Janha, tti Xí que joixin de ngajni, chonda que ndasenhe na inchin jitaxin ngain Palabré Dios, pero anto tangui tsonhe tti xí que rrondate chojni quežén para rrotse na na; icha jian si jehe rrogoanha.

²² Co are tene na, Jesús coá niottja co chjé gracias ngain Dios, cottimeja váña nio, co joanjo nio ngain cain na co ndačo:

—Jintte ra. Jihi rročo cuerpona.

²³ Cottimeja coá Jesús vaso co chjé gracias ngain Dios, co joanjo ngain na cai, co cain na vihi na nchinnchin.

²⁴ Co ndačo ngain na:

—Jihi rročo jnina que nchese gurá tti trato naroaxin co sinttji jnina para tsjenguijna tsje chojni.

²⁵ Co seguro rrondate tjo ra que janha isiha tti danjo ttouva hasta tsí tti nchanho que janha sihi tti vino naroaxin ngain lugar tti tetonha Dios.

Jesús ndačo que Pedro rrondate ixin jehe chonxinha Jesús

(Mt. 26.30-35; Lc. 22.31-34; Jn. 13.36-38)

²⁶ Are vinttetsje na ná himno, cottimeja sacjoi na ngain jnanchjan que dinhi Nttaolivo.

²⁷ Cottimeja Jesús ndačo ngain na:

—Cain jaha ra sinttechinhi ra de ixin janha ngain ttie jhi, ixin jitaxin ngain Palabré Dios: “Janha, tti Dios, nasoexon tti ttingaria coleco, co cain coleco ndarrochjequé va.”

²⁸ Pero después que janha rroxechon na, cottimeja janha saho tsji Galilea que jaha ra.

²⁹ Cottimeja Pedro ndačo ngain Jesús:

—Masqui cain jehe na sinttechín na de ixin soixin, pero janha nahi.

³⁰ Cottimeja Jesús ndačo ngain:

—Janha seguro rrondattjo que ngain ttie jiji saho que conttaxichia rrotsje va yoxin nttiha, jaha orrondačo ninxin nttiha ixin chonxinha na janha.

³¹ Pero Pedro xa ndačo ngain Jesús:

—Masqui rrochonda que senhe na conixin jaha, pero janha rrondačjanha ixin chonxinha.

Cai cain ni icha ndačo na xajeho.

*Jesús joinchetsenhe ñao Dios ngain Getsemani
(Mt. 26.36-46; Lc. 22.39-46)*

³² Cottimeja joihi na ngain ná lugar dinhi Getsemani, co Jesús ndačo ngain na:

—Tadintte ra nttihi are janha sinttatsán ñao Dios.

³³ Co sajoicao jeho Pedro, Jacobo co Juan. Co Jesús coexinhi conohe ná joaxaon anto soji co cai conohe anto jie joachjaon que joinchenihi ansén.

³⁴ Co ndačo ngain canio nijoicao:

—Janha tonona ngain ansenna ná joachjaon anto soji hasta rinaho ndasenhe na. Jaha ra dittoha ra nttihi, co dinttečhinha ra.

³⁵ Cottimeja Jesús sacjoi nchion cjin de ngain na, co vejantaha ngataha nontte. Co joinchetsenhe ñao Dios que si nchao jehe rrogattoha ngain tiempo que jitonchian are jehe anto tangui tsonhe.

³⁶ Co are jinchetsenhe ñao Dios, ndačo:

—Padre, soixin nchao nchehe cainxin cosa. Mexinxin si nchao, tančjandaha na janha satto ngain tti anto tangui que tsonna. Pero tsoenha

inchin janha rinaho, sino que tsonhe inchin soixin rinao.

³⁷ Cottimeja cjan Jesús ngain tti vittohe canio chojni que vacao, pero otatejoa canio na. Co ndačo ngain Simón Pedro:

—Simón, ¿aotaričhin? ¿Acoixianha tajoaritsjehe ni ná hora?

³⁸ Tadinttetsjehe ra co nchetsenhe ra ñao Dios para que xonhi cosa jianha sinttatjanji ra. Ndoa, espiritua ra anto rinao sintte jian, pero cuerpoa ra sojiha.

³⁹ Cottimeja cjan Jesús sacjoi para joinchetsenhe ñao Dios iná, co ndačo xajeho.

⁴⁰ Co are cjan joí ngain na jehe na otatejoa na iná ixin icoixinha con na de anto cottačhin. Co are xingamehe na ni inoencoia na quehe rrondačo na ngain Jesús.

⁴¹ Cottimeja ninxin nttiha Jesús sacjoi para joinchetsenhe ñao Dios iná, co are cjan ngain na, ndačo:

—Janché dinttečhin ra co nchejogaha ra ixin onchao; hora ojai are janha, tti Xí que joixin de ngajni, chonda que tsonchian ngá rá chojni jianha.

⁴² Dingattjen ra, nttimé joí tti ndačo quexén para rrotse na na janha.

Are tse na Jesús

(Mt. 26.47-56; Lc. 22.47-53; Jn. 18.2-11)

⁴³ Are Jesús xa jinichja ngain tti ní chojni mé, joí Judas, ná de tti tteyó chojni que vacao Jesús, co joicao Judas anto tsje xí que teyá espada co nttá. Xidána que vaquetonha ngain icha xidána,

ximaestroe ley co xittetonha ngain nihngo, xí mé rroanha xa cain chojni mé.

⁴⁴ Judas, tti joindačo queǵén para tse na Jesús, odindačo ngain na ixin quexehe señal sinchehe ngain Jesús para jehe na nohe na quensen Jesús, co ndačo:

—Tti janha tsetoxin para rrochjaha joajna, jehe mé. Tse ra co sattjiho ra co ttjiho ra cuidado jian que satsingaha.

⁴⁵ Co are ojoí, jehe conchienne ngain Jesús co ndačo:

—Maestro, Maestro.

Co coetoxin Jesús.

⁴⁶ Cottimeja tse na Jesús para sajoicao na.

⁴⁷ Pero ná de tti vintte nttiha joantsje espadé co cončinjihí na ndatsjoen ná xinchehe xé xidána icha importante.

⁴⁸ Cottimeja Jesús ndačo ngain cain chojni que joí:

—¿Quedonda jaha ra joihi ra conixin espada co nttá para rrotse ni ra janha como si janha rrocji ná tti chehe?

⁴⁹ Anto tsje nchanho joarihi janha ngayaha ra ngain nihngo icha importante para jointtacoanha ra, co ǵonhi tiempo tse ni ra. Pero janhi tsonhe, para tsonhe inchin jitaxin ngain Palabré Dios.

⁵⁰ Cottimeja cain chojni que vacao Jesús cointtohe na jeho, co jehe na sacoiंगा na.

Ná xanxí que sacoiंगा

⁵¹ Co cai nttiha ná xanxí vetsá xan jeho ná lontto roa. Co tse na xan.

⁵² Pero vačhjenga xan lontto mé co sacoiंगा xan ttolocho xan.

Jesús ngain juzgadoe nihngo
(Mt. 26.57-68; Lc. 22.54-55, 63-71; Jn. 18.12-14, 19-24)

⁵³ Cottimeja sajoicao na Jesús ngain xidána icha importante. Co xatte cainxin xidána que vaquetonha ngain icha xidána co cain xittetonha ngain nihngo, co cain ximaestroe ley.

⁵⁴ Co Pedro ta tti cjin jirroexin hasta joihi ngain patioe nchiandoha xidána icha importante, co ntiha tavehe xihohe ngain xohi, jehe conixin xipolicié nihngo icha importante.

⁵⁵ Cain xidána que vaquetonha ngain icha xidána, co cain xí que vechonda joachaxin ngain juzgadoe nihngo, cain xí mé cjoé xa quexén sinchecaxin xa Jesús para nasoenxon xa Jesús. Pero choha vittjehe xa Jesús ni ná cosa jianha.

⁵⁶ Co tsje na joinchecaxin na Jesús, pero xonhi chojni nichja xajeho inchin nichja iná chojni para joinchese gurá chó na.

⁵⁷ Cottimeja canxion na vingattjen na co joinchecaxin na Jesús co ndacho na:

⁵⁸ —Janha na coian na ndacho xí yá ixin jehe tsonxantte nihngo icha importante jihi que dinchekhjian chojni, co nincoa nchanho jehe xa sinchekhjian xa iná nihngo que jeha chojni nchekhjian.

⁵⁹ Pero masqui ndacho na jañá, xa nichjaha na mero xajeho.

⁶⁰ Cottimeja xidána icha importante vingattjen xa ngayé cainxin na, co joanchiangui xa ngain Jesús co ndacho xa:

—¿Xonhi rrondacho jaha? ¿Quehe rrocho cain tti jinichja chojni tehe de ixin jaha?

⁶¹ Pero Jesús xonhi nichja. Co jehe xa cjan xa joanchianguihi xa iná co ndačo xa:

—¿Ajaha tti Cristo, Xenhe Dios que anto jian?

⁶² Co Jesús ndačo:

—Ján, janha. Co sicon ni ra janha, tti Xí que joixin de ngajni, sarihi ngain lado jian de Dios, tti chonda cainxin joachaxin. Co cai sicon ni ra are rrocjan na sihi ngacjan ttjoi.

⁶³ Cottimeja jehe xidána icha importante mé goñao xa. Mexinxin coinchje xa lonttoe xa, co ndačo xa:

—¿Quedonda tsjé na icha chojni de testigo?

⁶⁴ Jaha ra ocoini ra quexén nichja xa jianha de ixin Dios. ¿Quehe xaxaon ra?

Co cainxin na ndačo na ixin Jesús jiquininxin ndasenne.

⁶⁵ Cottimeja canxion na coexinhi na cointtjitte na nttaté na, co coejehe na con Jesús, co xanguí na manazo, co ndache na:

—Si jaha ná profeta, ndačo quexehe tti goen.

Co cain xipolicié nihngo icha importante cai xanguí xa Jesús manazo.

Pedro ndačo ixin jehe chonxinha Jesús

(Mt. 26.69-75; Lc. 22.56-62; Jn. 18.15-18, 25-27)

⁶⁶ Are Pedro tají nontte ngain patioe nchian-doha xidána icha importante, vatto ná nchimozé xidána mé.

⁶⁷ Co are vicon ncha Pedro tajixixohe ngandehe xohi, jehe ncha tavengattjen ncha, tsjehe ncha co ndačo ncha ngain:

—Jaha cai vacjiho Jesús, tti joixin de Nazaret.

⁶⁸ Co Pedro ndačo ixin ndoaha ngain ncha co ndačo:

—Janha chonxinha xí yá, ni nonaha de quehe rrinichja jaha.

Cottimeja sacjoi para ngain puerté patio mé. Co rato mé tsje ná conttaxichia.

⁶⁹ Co n̄chimoza mé cjan n̄cha vicon n̄cha iná, co coexinhi ndācho n̄cha ngain nite nttiha:

—Xí jiha ná xivacao Jesús.

⁷⁰ Pero Pedro cjan ndācho ixin ndoaha. Cottimeja icanxin nite nttiha ndācho na ngain Pedro:

—Jaha seguro ná chojni que vacao Jesús, ixin jaha cai joixin regioen Galilea. Co inchin nichja chojni de Galilea, jamé nichja jaha.

⁷¹ Cottimeja Pedro jeho joanchia ná castigo ngain Dios para ixin jehe ixin joinchejurá ngain Dios co ndācho:

—Janha chonxinha xí yá que jaha ra tendachjenji ni ra.

⁷² Co rato mé tsje conttaxichia yoxin nttiha. Cottimeja Pedro ŋaxaon tti ndācho Jesús: “Icha saho que conttaxichia rrotsje va yoxin nttiha, jaha orondācho ninxin nttiha ixin chonxinha na janha.” Co are jehe ŋaxaon yá, jehe vehe tsjanga.

15

Jesús ngain Pilato

(Mt. 27.1-2, 11-14; Lc. 23.1-5; Jn. 18.28-38)

¹ Co are vingasán, ŋatte cain xidána que vaquetonha ngain icha xidána, co cain xittetonha ngain nihngo, co cain ximaestroe ley, co cain xivechonda joachaxin ngain juzgadoe nihngo. Co cainxin chojni mé coia na Jesús co joicao na ngain xigobernador Pilato.

2 Cottimeja Pilato joanchianguihi Jesús, co ndačo:

—¿Ajaha tti Rey de chojni judío?

Co Jesús ndačo:

—Ján, jañá inchin jaha ndačo.

3 Co cain xidána que vaquetonha ngain icha dána cjoanguihi xa Jesús anto tsje cosa.

4 Cottimeja Pilato cjan joanchianguihi Jesús iná, co ndačo:

—¿Quedonda xonhi nichja jaha? Tsjexin quejanhi cosa tjanguiha na.

5 Pero Jesús xonhi ndačo. Co Pilato inoeha quehe rrořaxaon de ixin jehe Jesús.

Are ndačo na ixin Jesús chonda que ndasenehe (Mt. 27.15-31; Lc. 23.13-25; Jn. 18.38—19.16)

6 Co ngain cada quiai pascua, Pilato vechonda costumbre de vacančjanda ná de tti teaxinhi. Quexeho de tti chojni que vaquinchiehe jehe na, Pilato vacančjanda vagáčhje.

7 Co tiempo mé, veaxinhi ná tti vinhi Barrabás. Jehe co icanxin na vintteaxinhi ixin goen na canxion chojni are vaquetocaho na gobierno romano.

8 Co tsje chojni xatte co ndache na Pilato ixin tsančjanda ná de tti teaxinhi, inchin vanchehe na cada quiai mé.

9 Co Pilato ndačo ngain na:

—¿Arinao ra tsančjanda tti jaha ra ncheguinhira Rey de chojni judío?

10 Jañá čo ixin jehe ovenohe ixin xidána que vaquetonha ngain icha xidána conchjoehe xa ngain Jesús ixin jehe cainxin cosa jian vanchehe. Mexinxin joinchechienxin xa Jesús nttiha.

¹¹ Pero cain jehe xa ndache xa cain chojni ixin icha jian rrondačo na ixin sačhe Barrabás.

¹² Cottimeja Pilato ndačo ngain na:

—¿Quehe rinao ra sinttaha janha ngain tti jaha ra ncheguini ra Rey de chojni judío?

¹³ Cottimeja cain jehe na coyao na, co ndačo na:

—¡Nchecrucificá!

¹⁴ Co Pilato ndačo ngain na:

—Pero ¿quedonda? ¿Quexehe cosa jianha joinchehe?

Pero cainxin na cjan na ndačo na sén:

—¡Nchecrucificá!

¹⁵ Co ixin Pilato joinao vittohe jian ngain chojni, mexinxin coančjanda Barrabás sacjoi. Co are joexin coetonha para vicaon Jesús, cottimeja coančjanda xisoldado para joinchecrucificá xa.

¹⁶ Cottimeja xisoldado sajoicao xa Jesús ngain patioe nchiandoha Pilato co nttiha vayé xa cainxin icha xisoldado cai.

¹⁷ Co coentsá xa Jesús ná lontto morado inchin lonttoe rey, co joinchecjinga xa Jesús ná corona de joxon nchaha.

¹⁸ Cottimeja coexinhi xa cjoanoa xa Jesús, co ndačo xa sén:

—¡Viva tti Rey de chojni judío!

¹⁹ Co xanguí xa nttá já Jesús, co cjoatjo xa nttatté xa, co vettoxin nttajochjihi xa ngain Jesús inchin rrojinchesayehe xa.

²⁰ Co are joexin joinchehe xa cain yá para cjoanoa xa Jesús, cottimeja joantsjehe xa tti lontto morado coentsá xa, co cjan xa joinchengá xa lonttoe Jesús. Cottimeja sajoicao xa Jesús para joinchecrucificá xa.

*Are joinchecrucificá na Jesús
(Mt. 27.32-44; Lc. 23.26-43; Jn. 19.17-27)*

²¹ Ná xí que vinhi Simón joixin ngain ciudad de Cirene. Co xí mé cjoí ndodé Alejandro co Rufo. Co are vatto nttiha, xisoldado joinchecame xa crué Jesús.

²² Joicao xa Jesús ngain ná lugar dinhi Gólgota, que mé rrocho Lugué Nttalorojá Chojni.

²³ Co joanjo xa ngain Jesús vino que jitecjan ndé ná ca dinhi mirra ixin rroguihi. Pero Jesús viha vino mé.

²⁴ Cottimeja joinchecrucificá na Jesús, co joantsje na suerte para chjeyehe na lonttoe Jesús.

²⁵ Las nueve ndoyo joinchecrucificá na Jesús.

²⁶ Co coentaxin na ná xón ixin quedonda joinchecrucificá na, co xón mé vetaxin: “Tti Rey de chojni judío.” Co coenganito na xón mé já cruz.

²⁷ Co joinchecrucificá na yó tti chehe ngaca Jesús, ná vehe lado jian Jesús, co iná vehe lado cjon Jesús.

²⁸ Jañá conhe inchin jitaxin ngain Palabré Dios tti ndačo: “Nasoenxon na jehe inchin na-doenxon na chojni jianha.”

²⁹ Co cain nijoitsjehe ixin quexén jí Jesús nganito cruz coenttjoinga rroha na co cjoanoa na Jesús co ndačo na ngain:

—Jaha ndačo ixin sinchexante nihngo icha importante co nincoa nchanho otsjaha sinchekhjian nihngo mé iná.

³⁰ Mexinxin jaxon daniaxin de nganito cruz yá jaho para senha.

³¹ Cai canxion xidána que vaquetonha ngain icha xidána, co ximaestroey ley cjoanoa xa Jesús, co ndache chó jecho xa:

—Jehe nchao cjoenguijna icha chojni, pero čhoha tsjenguijna cuerpoe jehe mismo.

³² Si jehe tti Cristo, Rey de chojni Israel, socon na saniaxin jaxon de nganito cruz, cottimeja, ján, sotticaon na.

Co hasta cayoi tti xite nganito cruz nttiha cjoanoa xa Jesús.

Are ndavenhe Jesús

(Mt. 27.45-56; Lc. 23.44-49; Jn. 19.28-30)

³³ Are ngosine nchanho, ndaconaxin xehe ngoixin región mé, co cončjenhe tti naxin xehe mé hasta ní hora tsocjin.

³⁴ Co hora mé Jesús coyao soji, co ndačo:

—Eloi, Eloi, ¿lama sabactani? —que rročo: Diona, Diona, ¿quedonda ndacointtona na janha?

³⁵ Co canxion nite nttiha coinhi na nichja Jesús pero coinxinha na quehe ndačo Jesús, co ndache chó na:

—Ttinhira, jidayé Elías.

³⁶ Cottimeja ná de jehe na coinga co coá ná cosa dinhi esponja. (Cosa mé datse jinda inchin chjon algodón.) Co jehe joinchetjao cosa mé conixin vino que anto san. Co coincjin ná nttá co tsín noi nganito cruz para Jesús rrocajindoe, co chojni mé ndačo ngain ni icha:

—Chonhe ra. Socon na aco tsí Elías para sinchegania.

³⁷ Cottimeja Jesús coyao soji, co ndavenhe.

³⁸ Co rato mé tti manta vettoa ngaxinhi nihngo icha importante vichjenga manta de noi hasta nontte.

³⁹ Co are xicapitán que jingattjen nttiha ngain Jesús vicon xa queḡén coyao Jesús co queḡén ndavenhe, ndaĉho xa:

—Seguro xí jihi Xenhe Dios.

⁴⁰ Co cai tsjehe canxion nĉhí masqui de cjin. Co ngacjén cain nĉhí mé, nttiha vehe Salomé co María Magdalena, co iná María tti cjoí janné José co Jacobo tti icha nĉhín.

⁴¹ Icha saho are Jesús vehe ngain nonttehe Galilea, canio nĉhí mé vangaria conixin jehe co vagayaconhe nĉha Jesús. Cai icha nĉhí joí conixin Jesús ngain Jerusalén. Co are jehe nganito cruz, nttiha vintte cainxin nĉhí mé cai.

Are Jesús xavá

(Mt. 27.57-61; Lc. 23.50-56; Jn. 19.38-42)

⁴² Omerocoa naxin xehe, co ixin nchanho mé víspera de tti nchanho para joinchejogaha na ngain quiai pascua, rroĉho ixin nchanho are ndavenhe Jesús nchanho para joinchechjian na cain tti joine na ndoexin are joinchejogaha na;

⁴³ mexinxin jaicoa joí ná tattíta vinhi José de rajna Arimatea. Jehe vechonda tsje joachaxin ngain juzgadoe nihngo Israel. Cai jehe anto joinao joí tti tiempo que Dios ttetonha. Co tattíta mé ḡaonha joixinhi tti jí Pilato co joanchiehe cuerpoe Jesús.

⁴⁴ Pilato anto goan admirado ixin ondavenhe Jesús co rroanha xicapitán para joanchianguihi xa.

⁴⁵ Co are xicapitán ndačo xa ixin ndoa ondavenhe Jesús, Pilato joanjo joachaxin para sajoicao José cuerpoe Jesús.

⁴⁶ Cottimeja José coehna ná manta fino, roa manta, co joinchegania cuerpoe Jesús co coensiha manta mé. Cottimeja coín cuerpoe Jesús ngain ná cueva naroaxin que odingue na ngadoho ná ttjao nttiha, co coejé conixin ná žo jie.

⁴⁷ María Magdalena co María janné José vicon na ttinó vittohe cuerpoe Jesús.

16

Are xechon Jesús

(Mt. 28.1-10; Lc. 24.1-12; Jn. 20.1-10)

¹ Co are vatto nchanho para joinchejogaha na, Salomé co María Magdalena, co iná María janné Jacobo sajoicao na ná žoan que diquehna na co anto čhjoin žajni žoan mé inchin perfume para rrochjé na cuerpoe Jesús.

² Co are čhinhi nchanho domingo, tti saho nchanho de semana, sacjoi na ngain tti vittohe cuerpoe Jesús.

³ Co ndache chó na ngatja nttiha:

—¿Pero quensen tsoxinca žo jie que jijé cueva yá?

⁴ Pero are joihi na nttiha vicon na ixin tti žo jie que vijé cueva ícoha žo nttiha, ojé jí žo.

⁵ Co joixinhi na ngaxinhi cueva mé. Co nttiha vicon na ná xanxí tají xan lado jian, co lonttoe xan roa lontto, co hasta tti nontte jicaxin lontto. Co jehe na žaon na.

⁶ Co jehe xanxí mé ndačo xan ngain na:

—Āaonha ra. Onona ixin ttjé ra Jesús de Nazaret, tti joinchecrucificá na. Pero jehe oxechon co icoha nttihi. Tsjexin ra tti coín na cuerpoe.

⁷ Mexinxin ttji ra ngain chojni que vacao Jesús, co ngain Pedro cai, co ndache ra na: “Jesús icha saho tsji Galilea que jaha ra. Co nttiha siconxin ra jehe inchin jehe ndattjo ra.”

⁸ Cottimeja canio nchí mé coinga ncha vačhjexin ncha de cueva mé co vintteřanga ncha ixin anto vintteřaon ncha. Co řonhi chojni ndache ncha ixin vintteřaoncoa ncha.

*Are Jesús řago ngain María Magdalena
(Jn. 20.11-18)*

⁹ Co después que Jesús xechon ngain saho nchanho de semana, jehe řago ngain María Magdalena, tti vechonda yáto espíritu jianha hasta que Jesús joinchexingamehe sé tiempo icha saho.

¹⁰ Cottimeja jehe María mé sacjoi joindache cain nivacao Jesús ixin Jesús xechon. Jehe nivacao Jesús anto vinttechín na co vatsjanga na are mé ixin Jesús ndavenhe.

¹¹ Co are coinhi na tti ndařho María vitticaonha na palabré jehe.

*Jesús řago ngain yó chojni que vacao
(Lc. 24.13-35)*

¹² Co después de jihi, Jesús řago ngain yó de tti chojni que vacao are satettji na ngatja nttiha. Co cayoi chojni mé vicon na Jesús inchin ojé chojni.

¹³ Cottimeja are cayoi chojni mé vatsoan ixin jehe mé Jesús, cjan na co ndache na tti icha chojni que vacao Jesús, pero jehe na, ni icha, řa vitticaonha na.

*Tti coetonhe Jesús nirepresentanté jehe
(Mt. 28.16-20; Lc. 24.36-49; Jn. 20.19-23)*

¹⁴ Co icha después Jesús xago ngain cainxin tti ttejngo chojni que vacao are tatene na. Co joinchesattehe na ixin vitticaonha na co ixin cha ansén na ixin vitticaonha na tti ndaço chojni que vicon Jesús dixechon.

¹⁵ Cottimeja ndaço Jesús ngain na:

—Ttji ra ngoixin mundo co ndache ra cainxin chojni tti joajna que danjo iná vida naroaxin.

¹⁶ Chojni que sitticaon co siguite, rrochonda iná vida naroaxin. Pero chojni que sitticaonha, mé Dios sinchecondená chojni mé.

¹⁷ Co janhi sinchehe chojni que sitticaon na janha: Jehe sinchegonda joachaxin de nombrena para senguixin espíritu jianha, co rronichja oje idioma que ni jehe tsinxinha.

¹⁸ Si rrotse ná conché, xonhi tsonhe masqui conché mé sinehe va jehe. Co si sihi ná cosa que ndadoen chojni, pero jehe xonhi tsonhe. Co saquehe rá ngataha chojni nihi co sinchetsenhe ñao Dios conixin joachaxin de nombrena co jehe tti nihi rroxingamehe.

*Are Jesús sacojín para ngajni
(Lc. 24.50-53)*

¹⁹ Co are Jesús, tti chonda cain joachaxin, joexin ndaço cain cosa yá ngain na, jehe sacojín para ngajni, co joiguehe ngain Dios lado jian.

²⁰ Co chojni Jesús sacjoi na cainxin lugar co ndache na chojni joajna que danjo iná vida naroaxin. Co jehe Jesús vacjenguijna na ngoixin

titi vacji na. Co cai jehe vanchesegurá cain titi vandačo na ixin chjé na joachaxin para vanchehe na seńal de milagro. Amén.

Tti jian joajné Jesucristo
New Testament in Popoloca, San Marcos Tlalcoyalco
copyright © 1982 Wycliffe Bible Translators, Inc.

Language: San Marcos Tlalcoyalco Popoloca (Popoloca, San Marcos Tlalcoyalco)

Translation by: Wycliffe Bible Translators, Inc.

Popoloca, Tlalcoyalco [pls], Mexico

Copyright Information

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Popoloca, San Marcos Tlalcoyalco

© 1982, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 18 Apr 2025 from source files
dated 29 Jan 2022

a23ba35e-b016-5f67-a705-694e460cf18a